


明
刊

五
十



147293

志卷第二十八

元史七十八

翰林學士亞夫和制誥兼修國史臣宋濂

翰林待制筆直郎無

國史院編修官


臣王濬

勅修

輿服一

儀衛附

若稽往古黃帝堯舜垂衣裳而天下治蓋取諸乾坤
服牛乘馬引重致遠蓋取諸大壯冕服車輿之制其來
尚矣虞書舜作十二章五服以命有德車服以賞有
功禮記虞鸞車夏鉤車商大輅至周損益前代弁師
掌王之五冕巾車掌王之五輅而儀文始備然孔子
論治天下之大法於殷輅取其質而得中周冕取其



三十八

文而得中也至秦併天下兼收六國車旗服御窮極侈靡有大駕法駕以及鹵簿漢承秦後多因其舊由唐及宋亦效秦法以為盛典於文質適中之義君子或得而議焉元初立國庶事草創冠服車輿並從舊俗世祖混一天下近取金宋遠法漢唐至英宗親祀太廟復置鹵簿今攷之當時上而天子之冕服皇太子冠服天子之質孫天子之五輅與腰輿象轎以及儀衛隊仗下而百官祭服朝服與百官之質孫以及於士庶人之服色粲然其有章秩然其有序大抵參酌古今隨時損益兼存國制用脩儀文於是朝廷之

盛宗廟之美百官之富有以成一代之制作矣作輿服志而儀衛附見于後云

冕服

天子冕服衮冕制以漆紗上覆曰緹青表朱裏緹之四周匝以雲龍冠之口圍縈以珍珠緹之前後旒各十二以珍珠為之緹之左右繫黹纁二繫以玄統承以玉瑱纁色黃絡以珠冠之周圍珠雲龍網結通翠柳調珠緹上橫天河帶一左右至地球鈿窠網結翠柳朱絲組二屬諸笄為纓絡以翠柳調珠簪以玉為之橫貫於冠。衮龍服制以青羅飾以生色銷金帝星

一日一月一昇龍四複身龍四山三十八火四十八
華蟲四十八虎雖四十八○裳制以緋羅其狀如裙
飾以文繡凡一十六行每行藻二粉米一黼二黻二
○中單制以白紗絳緣黃勒帛副之○蔽膝制以緋
羅有標緋絹為裏其形如檐袍上着之繡複身龍○
玉佩珩一琚一瑀一衝牙一璜二衝牙以繫璜珩下
有銀獸面塗以黃金雙璜夾之次又有衝下有衝牙
傍別施雙的以鳴用玉○大帶制以緋白二色羅合
縫為之○玉環綬制以納石失也金錦上有三小玉環
下有青絲織網○紅羅韠制以紅羅為之高鞞○履

制以納石失有雙耳二帶鉤飾以珠○韠制以紅綾
右按太常集禮至元十二年十一月博士議擬冕
天版長一尺六寸廣八寸前高八寸五分後高九
寸五分身圍一尺八寸三分并納言用青羅為表
紅羅為裏周迴緣以黃金天板下四面珠網結子
花素墜子前後共二十有四旒以玕珠為之青碧
線織天河帶兩頭各有玕珠金翠旒三節玉滴子
節花全紅線組帶二上有玕珠金翠旒玉滴子下
有金鐸二梅紅繡款幔帶一鞋續二玕珠垂繫上
用金萼子二簪窠款幔組帶鈿窠各二內組帶窠

四並鑲玉爲之玉簪一頂面鑲雲龍袞衣用青羅
夾製五采間金繪日月星辰山龍華蟲宗彛正而
日一月一升龍四山十二上下襟華蟲火各六對
虎雖各關對背星一升龍四山十二華蟲火各十
二對虎雖各六對中單用白羅單製羅領標襖裳
一帶標襖全紅羅八幅夾造上繡藻粉米黼黻藻
三十三粉米十六黼三十二黻三十二救膝一帶
標襖紅羅夾造八幅上繡升龍二綬一幅六采織
造紅羅托裏小綬三色同大綬銷金黃羅綬頭全
上間施三玉環並碾雲龍緋白大帶一銷金黃帶

頭鈿窠二十有四紅羅勒帛一青羅抹帶一佩二
玉上中下璜各一半月各二並碾玉爲雲龍文玉
滴子各二並珮珠穿造金篋鈎獸面水葉環釘全
涼帶一紅羅裏鑲金爲之上爲玉鷲七撻尾束各
一金攀龍口玳瑁襯釘馬一重底紅羅面白綾托
裏如意頭銷金黃羅緣口玉鼻人飾以珮珠金緋
羅錦襪一兩○大德十一年九月博士議唐制天
子袞冕垂白珠十有二旒以組爲纓色如其綬鞋
續充耳玉簪導玄衣纁裳凡十二章八章在衣日
月星辰山龍華蟲火宗彛四章在裳藻粉米黼黻

標領爲升龍皆織成之龍章以下每章一行每行
十二白紗中單黼領青標襪裾黻加龍山火三章
毳冕以上火山二章繡冕山一章玄冕無章革帶
太帶玉佩綬襪與上同馬加金飾享廟謁廟及朝
遣上將征還飲至踐祚加元服納后元日受朝及
臨軒冊拜王公則服之又宋制天子服有袞冕廣
尺二寸長四寸前後十有二旒二纒並貫玼珠又
有珠旒十二碧鳳銜之在珠旒外冕板以龍鱗錦
表上綴玉爲七星傍施琥珀餅犀各二十四周綴
金絲網鈿以玼珠雜寶玉加紫雲白鶴錦裏四柱

飾以七寶紅綾裏金飾玉簪導紅絲條組帶亦謂
之平天冠袞服青色日月星山龍雉虎雖七章紅
裙藻火粉米黼黻五章紅蔽膝升龍二並織成間
以雲彩飾以金釵花鈿窠裝以珍珠琥珀雜寶玉
紅羅襦裙繡五章青標襪裾六采綬一小綬三結
三玉環三素大帶朱裏青羅四紳帶二繡四紳盤
結綬帶飾並同袞服白帶中單青羅袿帶紅羅勒帛鹿盧
玉具劔玉纁首鏤白玉雙佩金飾貫珍珠金龍鳳
草帶紅機赤舄金釵花四神玉鼻祭天地宗廟受
冊尊號元日受朝冊皇太子則服之事未果行至

延祐七年七月英宗命禮儀院使八思吉斯傳旨
令省臣與太常禮儀院速製法服八月中書省會
集翰林集賢太常禮儀院官講議依秘書監所藏
前代帝王衮冕法服圖本命有司製如其式
鎮圭制以玉長一尺二寸有袋副之

皇太子冠服。衮冕。玄衣。纁裳。中單。蔽膝。
玉佩。大綬。朱鞵。赤舄。

按太常集禮至元十二年博士擬衮冕制用白珠
九旒紅絲組爲纓青纁充耳犀簪導青衣朱裳九
章五章在衣山龍華蟲火宗彝四章在裳藻粉米

黼黻白紗中單青標襪裾革帶塗金銀鈎釧蔽膝
隨裳色爲火山二章瑜玉雙佩四采織成大綬間
施玉環三白鞵朱舄舄加金塗銀釧大德十一年
九月照擬前代制度唐制皇太子衮冕垂白珠九
旒紅絲組爲纓青纁充耳犀簪導玄衣纁裳九章
五章在衣龍山華蟲火宗彝四章在裳藻粉米黼
黻織成之每行一章黼黻重以爲等每行九白紗
中單黼領青標襪裾革帶金鈎釧大帶蔽膝隨裳
色火山二章玉貝釧金寶飾玉纁首瑜玉雙佩朱
組帶大綬四采赤白纁紺純朱質長丈八尺首廣

九寸小雙綬長二尺六寸色同大綬而首半之間
施玉環三朱鞮赤舄加金飾侍從祭祀及謁廟加
元服納妃服之宋制皇太子衮冕垂白珠九旒紅
絲組為纓青纁充耳犀簪導青衣朱裳九章五章
在衣山龍華蟲火宗彛四章在裳藻粉米黼黻白
紗中單青標襪裾革帶塗金銀鈎黼蔽膝隨裳衣
火山二章瑜玉雙佩四采織成太綬間施玉環三
白鞮朱舄舄加塗金銀飾加元服從祀受冊謁廟
朝會服之已擬其制未果造
三獻官及司徒大禮使祭服○籠巾貂蟬冠五青羅

服五領袖襪俱紅羅裙五皂纁紅羅蔽膝五其羅花

白紗中單五黃纁紅組金綬紳五紅組金譯語曰

象笏五銀束帶五玉佩五白羅方心曲領五赤革

履五對白綾鞮五對

助奠以下諸執事官冠服○貂蟬冠獬豸冠七梁冠

六梁冠五梁冠四梁冠三梁冠二梁冠二百青羅服

二百領袖襪俱紅綾裙二百皂纁紅羅蔽膝二百紫

羅公服二百用花羅白紗中單二百黃纁織金綬紳二

百紅一各佩銅環銅束帶二百白羅方心曲領二

百銅佩二百展角幘頭二百塗金荔枝帶三十烏角

帶一百七十皂鞞二百對赤革履二百對白綾鞞二百對象笏三十銀杏木笏一百七十

凡獻官諸執事行禮俱衣法服惟監察御史二冠獬豸服青綬凡迎香讀祝及祀日遇陰雨俱衣紫羅公服六品以下皆得借紫

都監庫祠祭局儀鸞局神厨局頭目長行人等○交角幘頭五十窄袖紫羅服五十塗金束帶五十皂鞞五十對

初憲宗壬子年秋八月祭天于日月山用冕服自此始成宗大德六年春三月祭天于麗正門外丙

地命獻官以下諸執事各具公服行禮是時大都未有郊壇大禮用公服自此始九年冬至祭享用冠服依宗廟見用者製其後節次祭祀或合祀天地增配位從祀獻攝職事續置冠服於法服庫收掌法服二百九十有九公服二百八十窄紫二百九十有五至大間太常博士李之紹王天祐疏陳親祀冕無旒服大裘而加袞裘以黑羔皮爲之臣下從祀冠服歷代所尚其制不同集議得依宗廟見用冠服制度

社稷祭服○青羅袍一百二十三白紗中單一百二

十三紅梅花羅裙一百二十三藍織錦銅環綬紳二
紅織錦銅環綬紳一百一十七紅織錦玉環綬紳四
紅梅花羅蔽膝一百二十三革履一百二十三白綾
襪一百二十三白羅方心曲領一百二十三黃綾帶
一百二十三佩一百二十三銅珩璜者一百一十九
玉珩璜者四藍素紵絲帶一百二十三銀帶四銅帶
一百一十九冠一百二十三水角簪金梁冠一百七
紗冠一十獬豸冠二籠巾紗冠四木笏一百二十三
紫羅公服一百二十三黑漆幘頭一百二十三展角
全二色羅插領一百二十三鍍金銅荔枝帶一十角
帶一百一十三象笏一十三枝木笏一百一十枝黃
絹單包複一百二十三紫紵絲抹口青氈襪一百一
十三皂鞞一百二十三窄紫羅衫三十黑漆幘頭三
十銅束帶三十黃絹單包複三十皂鞞三十紫紵絲
抹口青氈襪三十

宣聖廟祭服○獻官法服○七梁冠三全鴉青袍三

絨錦綬紳三各帶青絨網方心曲領三藍結帶三銅

佩三紅羅裙三白絹中單三紅羅蔽膝三革履三白

全鞞○執事儒服○軟角唐巾白欄插領黃鞞角帶皂

鞞各九十有八○曲阜祭服○連蟬冠四十有三七

梁冠三五梁冠三十有六三梁冠四皂紵絲鞋三十
有六鞞舒角幘頭二軟角唐巾四十角簪四十有三
冠纓四十有三副有九八十條象牙笏七木笏三十有八
玉佩七有十有銅佩三十有六有九七帶八十有五
藍鞞帶七紅鞞帶三十有六烏角帶二黃鞞帶烏角
偏帶四十大紅金綬結帶七用上玉環青羅大袖夾
衣七紫羅公服二褐羅大袖衣三十有六白羅衫四
十白絹中單三十有六白紗中單七大紅羅夾蔽膝
七大紅夾裳緋紅羅夾蔽膝三十有六緋紅夾裳四
黃羅夾裳三十有六黃羅大帶七白羅方心曲領七

紅羅綬帶七黃絹大帶三十有六皂鞞白羊毳襪各
四十有二對大紅羅鞋七鞞白絹夾襪四十有三鞞○
質孫漢言一色服也內庭大宴則服之冬夏之服不
同然無定制凡勳戚大臣近侍賜則服之下至於樂
工衛士皆有其服精粗之制上下之別雖不同總謂
之質孫云○天子質孫冬之服凡十有一等服納石
失金錦怯綿里翦茸也則冠金錦暖帽服大紅桃紅紫
藍綠寶里寶里服之有欄者也則冠七寶重頂冠服紅黃粉皮
則冠紅金荅子暖帽服白粉皮則冠白金荅子暖帽
服銀鼠則冠銀鼠暖帽其上並加銀鼠比肩俗稱曰

忽夏之服凡十有五等服。答納都納石失綴大珠則

冠寶頂金鳳。鉸笠服。速不都納石失綴小珠則冠珠

子捲雲冠。服納石失。則帽亦如之。服大紅珠寶里。紅

毛子。答納。則冠珠緣邊。鉸笠服。白毛子。金絲寶里。則

冠白藤寶貝帽。服駝褐毛子。則帽亦如之。服大紅綠

藍銀褐棗褐。金繡龍五色羅。則冠金鳳頂。笠各隨其

服之色。服金龍青羅。則冠金鳳頂。漆紗冠。服珠子褐

七寶珠龍。答子。則冠黃牙忽寶貝珠子帶。後簷帽。服

青速夫金絲。闌子速夫回回毛也則冠七寶漆紗帶。後

簷帽。○百官質孫冬之服。凡九等。大紅納石失。一大

紅怯綿里。一大紅官素。一桃紅藍綠官素。各一紫黃

鴉青。各一夏之服。凡十有四等。素納石失。一聚線寶

里。納石失。一棗褐。渾金間絲。蛤珠。一大紅官素。帶寶

里。一大紅明珠。答子。一桃紅藍綠銀褐。各一高麗鴉

青雲袖羅。一駝褐。茜紅。白毛子。各一鴉青官素。帶寶

里。一

百官公服。○公服制。以羅大袖盤領。俱右衽。一品紫

大獨科花。徑五寸。二品小獨科花。徑三寸。三品散答

花。徑二寸。無枝葉。四品五品小雜花。徑一寸五分。六

品七品。緋羅小雜花。徑一寸。八品九品。綠羅無文。○

幘頭漆紗爲之展其角。笏制以牙上圓下方或以銀杏木爲之。偏帶正從一品以玉或花或素二品以花犀三品四品以黃金爲荔枝五品以下以烏犀並八胯鞞用朱革。鞞以皂皮爲之。

儀衛服色。交角幘頭其制巾後交折其角。鳳翅幘頭制如唐巾兩角上曲而作雲頭兩旁覆以兩金鳳翅。學士帽制如唐巾兩角如匙頭下垂。唐巾制如幘頭而擗其角兩角上曲作雲頭。控鶴幘頭制如交角金縷其額。花角幘頭制如控鶴幘頭兩角及額上簇象生雜花。錦帽制以漆紗後幅兩旁

前拱而高中下後畫連錢錦前額作聚文。平巾幘黑漆革爲之形如進賢冠之籠巾或以青或以白。武弁制以皮加漆。甲騎冠制以皮加黑漆雌黃爲緣。抹額制以緋羅繡寶花。巾制以絕五色畫寶相花。兜鍪制以皮金塗五色各隨其甲。襯甲制如雲肩青錦質緣以白錦衷以氈裏以白絹。雲肩制如四垂雲青緣黃羅五色嵌金爲之。衲襠制如衫。襯袍制用緋錦武士所以裼衲襠。士卒袍制以絹絕繪寶相花。窄袖袍制以羅或絕。辨線襖制如窄袖衫腰作辨線細摺。控鶴襖制以青緋二

色錦圓峇寶相花。○窄袖襖長行輿士所服紺緞色。
 ○樂工襖制以緋錦明珠琵琶窄袖瓣線細摺。○甲
 覆膊掩心扞背扞肢制以皮或為虎文獅子文或施
 金鎧鎖子文。○臂鞬制以錦綠絹為裏有雙帶。○錦
 騰蛇束麻長一丈一尺裹以紅錦。○束帶紅鞞雙獺
 尾黃金塗銅胯餘同腰帶而狹小。○條環制以銅黃
 金塗之。○汗胯制以青錦緣以銀褐錦或繡撲獸間
 以雲氣。○行滕以絹為之。○鞋制以麻。○鞵鞋制以
 皮為履而長其鞞縛於行滕之內。○雲頭鞵制以皮
 幫嵌雲朵頭作雲象鞵束于脛

服色等第仁宗延祐元年冬十有二月定服色等第
 詔曰比年以來所在士民靡麗相尚尊卑混淆僭禮
 費財朕所不取貴賤有章益明國制儉奢中節可阜
 民財命中書省定立服色等第于后。○一蒙古人不
 在禁限及見當怯薛諸色人等亦不在禁限惟不許
 服龍鳳文龍謂五爪二角者。○一職官除龍鳳文外一品二
 品服渾金花三品服金峇子四品五品服雲袖帶襪
 六品七品服六花八品九品服四花職事散官從一高繫腰
 五品以下許用銀并減鐵。○一命婦衣服一品至三
 品服渾金四品五品服金峇子六品以下惟服銷金

并金紗卷子首飾一品至三品許用金珠寶玉四品

五品用金玉珍珠六品以下用金惟耳環用珠玉同籍

不限親疎期親雖別籍并出嫁同一器皿謂茶酒器除釵造龍鳳文不

得使用外一品至三品許用金玉四品五品惟臺盞

用金六品以下臺盞用鍍金餘並用銀○一帳幕除

不得用赭黃龍鳳文外一品至三品許用金花刺繡

紗羅四品五品用刺繡紗羅六品以下用素紗羅○

一車輿除不得用龍鳳文外一品至三品許用間金

粧飾銀螭頭繡帶青幔四品五品用素獅頭繡帶青

幔六品至九品用素雲頭素帶青幔○一鞍轡一品

許飾以金玉二品三品飾以金四品五品飾以銀六

品以下並飾以鍮石銅鐵○一内外有出身考滿應

入流見役人負服用與九品同○一授各按下令旨

鈞旨有印信見任勾當人負亦與九品同○一庶人

除不得服赭黃惟許服暗花紵絲紬綾羅毛毳帽笠

不許飾用金玉鞞不得裁制花樣首飾許用翠花并

金釵鉀各一事惟耳環用金珠碧甸餘並用銀酒器

許用銀壺瓶臺盞盃鉢餘並禁止帳幕用紗絹不得

赭黃車輿黑油齊頭平頂皂幔○一諸色目人除行

營帳外其餘並與庶人同○一諸職官致仕與見任

營帳外其餘並與庶人同○一諸職官致仕與見任

同解降者依應得品級不叙者與庶人同。一父祖有官既沒年深非犯除名不叙之限其命婦及子孫與見任同。一諸樂藝人等服用與庶人同凡承應粧扮之物不拘上例。一皂隸公使人惟許服絀絹。一娼家出入止服皂襪子不得乘坐車馬餘依舊例。一今後漢人高麗南人等投充去薛者並在禁限。一服色等第上得兼下下不得僭上違者職官解見任期年後降一等叙餘人決五十七下違禁之物付告捉人充賞有司禁治不嚴從監察御史廉訪司究治。御賜之物不在禁限。

輿輅

玉輅青質金裝青綠藻井栲栳輪蓋外施金裝雕木雲龍內盤碾玉福海圓龍一頂上匝以金塗鍮石耀葉八十一上圍九者二中圍九者三下圍九者四頂輪衣三重上二重青繡雲龍瑞草下一重無文輪衣內黃屋一黃素紵絲瀝水下周垂朱絲結網青紵絲繡小帶四十八帶頭綴金塗小銅鈴青紵絲繡絡帶二頂輪平素面夾用青紵絲蓋四周垂流蘇八飾以五色茸線結網五重金塗銅鈸五金塗木珠二十有五又擊玉雜佩八珩璜衝瑀全金塗鍮石鈎掛十六

黃茸貫頂天心直下十字繩二各長三丈蓋下立朱
漆柱四柱下直平盤虛櫃中樞三十下外桃二漆繪
犀象鸚鵡錦雉孔雀隔窠嵌裝花板櫃周朱漆勾闌
雲拱地震葉百七十有九下垂牙護泥虛板并朱漆
畫瑞草勾闌上玉行龍十碾玉蹲龍十孔雀羽臺九
水精面火珠七金圈焰銅照八輿下周垂朱絲結網
飾以金塗鍮石鐸三百綵畫鍮石梅萼嵌網眼中輿
之長轆三界轆勾心各三上下龍頭六前轆引手玉
螭頭三並繫以蹲龍後轆方罨頭三桃頭十六繪以
蹲龍三轆頭衡一兩端玉龍頭二上列金塗銅鳳十

二含以金塗銅鈴輿之軸一輪二軸之掌羅二明轆
蹲龍繪並青漆輪之輻各二十四轂首壓貼金塗銅
轂葉八十一金塗鍮石擎耳戀攀四櫃之前朱漆金
裝雲龍輅牌一牌字以玉裝綴輅之箱四壁雕鍍漆
畫填心隔窠龜文華板上層左畫青龍右畫白虎前
畫朱雀後畫玄武輅之前額玉行龍二奉一水精珠
後額如之前兩柱青茸鈴索五貼金鸞和大響銅鈴
十金塗鍮石雙魚五下朱漆軾櫃一櫃上金香毬金
香寶金香合銀灰盤各一並黃絲綬帶輅之後朱漆
後鞞一金塗曲戍黃紵絲銷金雲龍門簾一緋紵絲

繡雲龍帶二輅之中金塗鍮石較碾玉龍椅一靠背
上金塗圈焰玉明珠一左建太常旂十有二旂青羅
繡日月五星升龍右建闡戟一九旂青羅繡雲龍中
央黃羅繡青黑黼文兩旗綢杠並青羅旗首金塗鍮
石龍頭二金塗銅鈴二金塗鍮石鉸青纓綉十二重
金塗木珠流蘇十重龍椅上方坐一綠褥一皆錦
銷金黃羅夾帕一方輿地褥二勾闌內褥八皆用雜
錦綺青漆金塗鍮石鉸葉踏道一小褥五重青漆雕
木塗金龍頭行馬一小青漆梯一青漆柄金塗長托
叉二短托叉二金塗首青漆推竿一青茸引輅索二
各長六丈餘金塗銅環二黃茸綉一輅馬誕馬並青
色鞍轡鞅勒纓拂鞞並青帟金飾誕馬青織金紵絲
履四青羅銷金綃裏籠鞍六蓋輅黃綃大象帕一黃
油綃帕一駕士平巾大袖並青繪紵絲爲之

至治元年英宗親祀太廟詔中書及太常禮儀院
禮部定擬制鹵簿五輅以平章政事張瑄留守王
伯勝將作院使明里董阿侍儀使乙刺徒滿董其
事是年玉輅成明年親祀御之後復命造四輅工
未成而罷

金輅赤質金粧青綠藻井栲栳輪蓋外施金粧雕木

雲龍內盤真金福海圓龍一頂上匝以金塗鍮石耀
葉八十一上圍九者二中圍九者三下圍九者四頂
輪衣三重上二重大紅繡雲龍瑞草下一重無文輪
衣內黃屋一黃素紵絲瀝水下垂朱絲結網一周大
紅紵絲繡小帶四十八帶頭綴金塗小銅鈴三百大
紅紵絲繡絡帶二頂輪平素面夾用緋紵絲蓋之四
周垂流蘇八飾以五色茸線結網五重金塗鍮石雜佩
八珩璜衝瑤全金塗鍮石鈎掛十有六黃絨貫頂天
心直下十字繩二蓋下立朱漆柱四柱下直平盤虛
櫃中櫺三十其下外枕二漆繪犀象鸚鵡錦雉孔雀

隔窠嵌粧花板櫃上周遭朱漆勾闌雲拱地震葉一
百七十有九下垂牙護泥虛板並朱漆畫瑞草勾闌
上金塗鍮石行龍十二金塗鍮石蹲龍十孔雀羽臺
九水精面火珠七金圈焰銅照八輿下垂朱絲結網
一遭飾以金塗鍮石鐸子三百綵畫鍮石梅萼嵌網
眼中輿之長轆三界轆勾心各三上下龍頭六前轆
引手金塗鍮石螭頭三並繫以蹲龍後轆方卷頭三
枕頭十六繫以蹲龍三轆頭衡一兩端金塗鍮石龍
頭二上列金塗銅鳳十二含以金塗銅鈴輿之軸一
輪二軸之掌羅二明轄蹲龍綵並漆以赤輪之輻各

二十有四轂首壓帖金塗銅轂葉八十有一金塗鑰
石擎耳憲攀四櫃之前朱漆金粧雲龍輅牌一金塗
鐵曲戍輅之箱四壁雕鏤漆畫填心隔窠龜文花板
上層左畫青龍右畫白虎前畫朱雀後畫玄武輅之
前額金行龍二奉一水精珠後額亦如之前兩柱緋
絨鈴索五貼金鸞和大響銅鈴十金塗鑰石雙魚五
下朱漆軾櫃一櫃上金香毯一金香寶一金香合銀
灰盤一並黃紵絲綬帶輅之後朱漆後轡一金塗曲
戍黃紵絲銷金雲龍門簾一緋紵絲繡雲龍帶二輅
之中黃金粧鉸龍椅一靠背上金塗圈焰玉明珠一

左建太常旗十有二旂緋羅繡日月五星升龍右建
關戟一九旂緋羅繡雲龍中央黃羅繡青黑黼文兩
旗綢杠並大紅羅旗首金塗鑰石龍頭二金塗銅鈴
二金塗鑰石鉸朱纓綾十二重金塗木珠流蘇十二
重龍椅上金錦方坐子一綠可貼金錦褥一銷金黃
羅夾帕一方輿地金錦褥一綠可貼金錦褥一勾闌內可
貼條褥四藍紵絲條褥四朱漆金塗鑰石鉸葉踏道
一小可貼條褥五重朱漆雕木塗金龍頭行馬一小
朱漆梯一朱漆柄金塗長托义二短托义二金塗首
朱漆推竿一紅絨引輅索二金塗銅環二黃絨執綏

一輅馬誕馬並赤色鞍轡鞅勒纓拂套項並赤韋金粧誕馬紅織金紵絲履四副紅羅銷金紅綃裏籠鞍六蓋輅黃綃大蒙帕一黃油綃帕一駕士平巾大袖並緋繡紵絲爲之

象輅黃質金粧青綠藻并栲栳輪蓋外施金粧雕木雲龍內盤描金象牙雕福海圓龍一項上匝以金塗鑰石耀葉八十有一上圍九者二中圍九者三下圍九者四頂輪衣三重上二重黃繡雲龍瑞草下一重無文輪衣內黃屋一黃素紵絲瀝水下垂朱絲結網一遭黃紵絲繡小帶四十有八帶頭綴金塗小銅鈴

二百黃紵絲繡絡帶二頂輪平素面夾用黃紵絲蓋之四周垂流蘇八飾以五色苜線結網五重金塗銅鉸五金塗木珠二十有五又繫金塗鑰石雜佩八珎璜衝瑤全金塗鑰石鈎掛十有六黃絨貫頂天心直下十字繩二蓋下立朱漆柱四柱下直平盤虛櫃中櫺三十下外枕二漆繪犀象鸚鵡錦雉孔雀隔窠嵌粧花板櫃上周遭朱漆勾闌雲拱地震葉百七十有九下垂牙護泥虛板並朱漆畫瑞草勾闌上描金象牙雕行龍十蹲龍十孔雀羽臺九水精面火珠七金圈焰銅照八輿下垂朱絲結網一遭飾以金塗鑰石

鐸子三百采畫鑰石梅萼嵌網眼中輿之長轆三界
轆勾心各三上下龍頭六前轆引手描金象牙雕螭
頭三并繫以蹲龍後轆方輦頭三挑頭十有六繫以
蹲龍三轆頭衛一兩端描金象牙雕龍頭二上列金
塗銅鳳十二舍以金塗銅鈴輿之軸一輪二軸之掌
羅二明轆蹲龍綵並漆以黃輪之輻各二十有四轂
首壓貼金塗銅轂葉八十有一金塗鑰石擊耳戀攀
四櫃之前朱漆金粧雲龍輅牌一金塗鐵曲戍輅之
箱四傍雕鏤漆畫填心隔窠龜文花板上層左畫青
龍右畫白虎前畫朱雀後畫玄武輅之前額描金象
牙雕行龍二奉一水精珠後額如之前兩柱黃絨鈴
索五貼金鸞和大響銅鈴十金塗鑰石雙魚五下朱
漆軾櫃一櫃上金香毬一金香寶一金香合一銀灰
盤一並黃紵絲綬帶輅之後朱漆後轆一金塗曲戍
黃紵絲銷金雲龍門簾一緋紵絲繡雲龍帶二輅之
中黃金粧鉸描金象牙雕龍椅一靠背上金塗圈紈
玉明珠一左建太常旂一十有二旂黃羅繡日月五
星升龍右建闕戟一九旂黃羅繡雲龍中央黃羅繡
青黑繡文兩旗綢杠並黃羅旗首金塗鑰石龍頭二
金塗銅鈴二金塗鑰石鉸黃纓綵十二重金塗木珠

流蘇十二重龍椅止金錦方坐一綠可貼褥一勾闌
內可貼條褥四藍紵絲條褥四黃漆金塗鍮石鉸葉
踏道一小可貼條褥五重黃漆木塗金龍頭行馬一
小黃漆梯一黃漆柄金塗長托义二短托义二金塗
首黃漆推竿一黃絨引轆索二金塗銅環二黃絨執
綬一轆馬誕馬皆黃色鞍轡鞅勒纓拂套項並金粧
黃常誕馬銀褐織金紵絲履四副黃羅銷金黃絹裏
籠鞍六蓋轆黃絹大蒙帕一黃油絹帕一駕士平巾
大袖並黃繡紵絲爲之
革輅白質金粧青綠藻井栲栳輪蓋外施金粧雕木

雲龍內盤描金白檀雕福海圓龍一頂上匝以金塗
鍮石耀葉八十有一上圍九者二中圍九者三下圍
九者四頂輪衣三重上二重素白繡雲龍瑞草下一
重無文輪衣內黃屋一黃素地紵絲瀝水下垂朱絲
結網一遭素白紵絲繡小帶四十有八帶頭綴金塗
小銅鈴三百素白紵絲繡絡帶二頂輪平素面夾用
白素紵絲蓋之四周垂流蘇八飾以五色織線結網
五重金塗銅鍍五金塗木珠二十有五又繫金塗鍮
石雜佩八珩璜衝瑀全金塗鍮石鈎掛十有六黃絨
貫頂天心直下十字繩二蓋下立朱漆柱四柱下直

平盤虛櫃中櫺三十下外挑二漆繪革鞞犀象鸚鵡
錦雉孔雀隔窠嵌粧花板櫃上周遭朱漆勾闌雲拱
地震葉百七十有九下垂牙護泥虛板並朱漆畫瑞
草勾闌上描金白檀行龍十擺白蹲龍十孔雀羽臺
九水精面火珠七金圈焰銅照八輿下垂朱絲結網
一遭飾以金塗鑰石鐸子三百綵畫鑰石梅萼嵌網
眼中輿之長轆三界轆勾心各三上下龍頭六前轆
引手擺白螭頭三並繫以蹲龍後轆方卷頭三枕頭
十有六繫以蹲龍三轆頭衡一兩端擺白龍頭二上
列金塗銅鳳十二含以金塗銅鈴輿之軸一輪二軸

之掌羅二明轄蹲龍絳皆漆以白其輪之輻各二十
有四轂首壓貼金塗銅轂葉八十有一金塗鑰石擎
耳戀攀四櫃之前朱漆金粧雲龍輅牌一金塗鐵曲
戍輅箱之四傍雕鏤革鞞漆畫填心隔窠龜文花板
上層左畫青龍右畫白虎前畫朱雀後畫玄武輅之
前額白檀行龍二奉一水精珠後額如之前兩柱素
曰絨鈴索五貼金鸞和大響銅鈴十金塗鑰石雙魚
五下朱漆革鞞軾櫃一櫃上金香毬一金香寶一金
香合一銀灰盤一皆黃紵絲綬帶輅之後朱漆革鞞
後輅一金塗曲戍黃紵絲銷金雲龍門簾一緋紵絲

繡雲龍帶二輅之中金粧鉸白檀雕龍椅一靠背上
 金塗圈焰玉明珠一左建太常旂一十有二旂白羅
 繡日月五星升龍右建闕戟一九旂素白羅繡雲龍
 中央黃羅繡青黑黼文兩旗綢杠並素白羅旗首金
 塗鑰石龍頭二金塗銅鈴二金塗鑰石鉸素白纓綉
 十有二重金塗木珠流蘇十有二重龍椅上金錦方
 座一綠可貼褥一銷金黃羅夾帕一方輿地金錦褥
 一綠可貼褥一勾闌內可貼條褥五重素白漆雕木
 塗金龍頭行馬一小白漆梯一白漆枹金塗長托义
 二短托义二金塗首白漆推竿一白絨引輅索二金

塗銅環二黃絨執綬一輅馬誕馬皆白色鞍轡鞞勒
 纓拂套項皆白韋金粧誕馬白織金紵絲屨四副白
 羅銷金白絹裏籠鞍六盖輅黃絹大蒙帕一黃油絹
 帕一駕士平巾大袖皆白繡紵絲為之

木輅黑質金粧青綠藻井栲栳輪蓋外施金粧雕木
 雲龍內盤描金紫檀雕福海圓龍一頂上匝以金塗
 鑰石耀葉八十有一上圍九者二中圍九者三下圍
 九者四頂輪衣三重上二重皂繡雲龍瑞草下一重
 無文輪衣內黃屋一黃素紵絲瀝水下垂朱絲結網
 一遭皂紵絲繡小帶四十有八帶頭綴金塗小銅鈴

三百皂紵絲繡絡帶二頂輪平素面夾用檀褐紵絲
蓋之四周垂流蘇八飾以五色絨線結網五重金塗
銅鈸五金塗木珠二十五又繫金塗鑰石雜佩八珩
璜衝瑀全金塗鑰石掛鈎十有六黃絨貫頂天心直
下十字繩二蓋下立朱漆柱四柱下直平盤虛櫃中
櫺三十下外挑二漆繪犀象鸚鵡錦雉孔雀隔窠嵌
粧花板櫃上周遭朱漆勾闌雲拱地霞葉百七十有
九下垂牙護泥虛板皆朱漆畫瑞草勾闌上金嵌鑲
鐵行龍十蹲龍十孔雀羽臺九水精面火珠七金圈
焰銅照八輿下垂朱絲結網一遭飾以金塗鑰石鐸

子三百綵畫鑰石梅萼嵌網眼中輿之長轆三界轆
勾心各三上下龍頭六前轆引手金嵌鑲鐵螭頭三
皆綵以蹲龍後轆方罨頭三挑頭十有六繫以蹲龍
三轆頭衡一兩端金嵌鑲鐵龍頭二上列金塗銅鳳
十二含以金塗銅鈴輿之軸一輪二軸之掌羅二明
轉蹲龍綵並漆以黑輪之輻各二十有四轂首壓貼
金塗銅轂葉八十有一金塗鑰石擎耳戀攀四櫃之
前朱漆金粧雲龍輅牌一金塗鐵曲戍輅之箱四傍
雕鏤漆畫填心隔窠龜文花板上層左畫青龍右畫
白虎前畫朱雀後畫玄武輅之前額金嵌鑲鐵行龍

二奉一水精珠後額如之前兩柱皂絨鈴索五貼金
鸞和大響銅鈴十金塗鍮石雙魚五下朱漆軾櫃一
櫃上金香毬一金香寶一金香合一銀灰盤一皆黃
紵絲綬帶輅之後朱漆後轡一金塗曲戍黃紵絲銷
金雲龍門簾一緋紵絲繡雲龍帶二輅之中金粧烏
木雕龍椅一靠背上金塗圈焰玉明珠一左建太常
旂一十有二旂皂羅繡日月五星升龍右建闌戟一
九旂皂羅繡雲龍中央黃羅繡青黑黼文兩旗網杠
並皂羅旗首金塗鍮石釵紫纓綉十有二重金塗流
蘇十有二重龍椅上金錦方座一綠可貼褥一銷金

黃羅夾帕一方輿地金錦褥一綠可貼褥一勾闌內
可貼條褥四藍紵絲條褥四黑漆金塗鍮石鉸葉踏
道一小可貼條褥五重黑漆雕木塗金龍頭行馬一小
黑漆梯一黑漆柄金塗長托叉二短托叉二金塗首
黑漆推竿一皂絨引輅索二金塗銅環二黃絨執綏
一輅馬誕馬並黑色鞍轡鞞勒纓拂套項皆以淺黑
韋金粧誕馬紫織金紵絲屨四副紫羅銷金紫絹裏
籠鞍六蓋輅黃絹大蒙帕一黃油絹帕一駕士平巾
大袖皆紫繡紵絲爲之
腰輿制以香木後背作山字牙嵌七寶粧雲龍屏風

上施金圈燭明珠兩傍引手屏風下施雕鏤雲龍床
坐前有踏床可貼錦褥一坐上貂鼠緣金錦條褥綠
可貼方坐
象轎駕以象凡巡幸則御之

志卷第二十八

元史二十九

志卷第二十九

翰林學士中大夫知制誥蕭修國舅吳瀛翰林待制張真郎知制誥國史院編修官王禕等奉

勅

卷字

輿服二

儀仗

皂纛國語讀如禿建纓于素漆竿九行幸則先驅建纛夾

以馬鼓居則置纛于月華門西之隅室。絳麾金塗

竿上施圓盤朱絲拂三層紫羅袋韜之。金節制如

麾八層韜以黃羅雲龍袋又引導節金塗龍頭朱漆

竿懸五色拂上施銅鈸。朱雀幢制如節而五層韜

以紅繡朱雀袋。○青龍幢制如前，韜以碧繡青龍袋。
○白虎幢制如前，韜以素繡白虎袋。○玄武幢制如前，韜以皂繡玄武袋。○爆稍制如節頂，刻爆牛首，有袋上加碧油。○絳引幡，四角朱綠蓋，每角垂羅文雜佩，繫于金銅鈎竿。竿以朱飾，懸五色間暈羅，下有橫木板作碾玉文。○告止幡，緋帛錯綵，為告止字，承以雙鳳立仗者，紅羅銷金升龍餘如絳引。○傳教幡，制如告止，緋錯綵，為傳教字，承以雙白虎立仗者，白羅繪雲龍。○信幡，制如傳教，緋錯綵，為信字，承以雙龍立仗者，繪飛鳳。○黃麾，幡制如信幡，錯綵，為黃麾篆。

○龍頭竿，繡斃竿，如戟，無鈎，下有小橫木，刻龍頭，垂朱綠蓋，每角綴珠佩，一帶帶末有金銅鈴。○圍子，制以金塗攢竹杖，首貫銅錢，而以紫絹冒之。○副竿，制以木，朱漆之。○火輪竿，制以白鐵，為小車輪，建于白鐵竿首，輪及竿皆金塗之。上書西天呪語，帝師所制，常行為親衛中道，正行在劈正斧之前，以法佛衛，以祛邪僻，以鎮轟雷，馬蓋辟惡車之意也。○豹尾竿，制如戟，繫豹尾，朱漆竿。○寶輿，方案緋羅銷金雲龍案，衣緋羅銷金象襯，復案傍有金塗鐵鞠，四龍頭竿，結綬二副之。○香蹬，朱漆案，黃羅銷金雲龍案，衣上設

金塗香爐一燭臺二案旁金塗鐵鞠四龍頭竿結綬
二副之。○香案朱漆案緋羅銷金雲龍案衣上設金
香爐合各一餘同香蹬殿庭陳設則除龍頭竿結綬
○詔案制如香案。○冊案制如前。○寶案制如前。○
表案制如香案上加矮闌金塗鐵鞠四竿二副之緋
羅銷金蒙複。○禮物案制如表案。○交椅銀飾之塗
以黃金。○杌子四脚小床銀飾之塗以黃金。○鳴鞭
綠柄鞭以梅紅絲爲之梢用黃茸而漬以蠟。○鞭桶
制以紫絕表白絹裏皮緣兩末。○蒙鞍青錦緣緋錦
複。○水瓶制如湯瓶有蓋有提有紫銀爲之塗以黃

金。○鹿盧制如乂字兩頭卷塗金粧釵朱絲繩副之
○水盆黃金塗銀粧釵爲之。○淨巾緋羅銷金雲龍
有裏。○香毬制以銀爲座上插蓮花爐爐上罩以圓
毬鏤細縕旋轉文于上黃金塗之。○香合制以銀徑
七寸塗黃金釵雲龍於上。○金拂紅犂牛尾爲之黃
金塗龍頭柄。○唾壺制以銀寬緣虛腹有蓋黃金塗
之。○唾盃制以銀形圓如缶有蓋黃金塗之。○外辦
牌制以象牙書國字背書漢字填以金。○外備牌制
如前。○中嚴牌制如前時牌制同外備而小。○板位
制以木長一尺二寸闊一尺厚六分白髹黑字。○大

繖赤質正方四角銅螭首塗以黃金紫羅表緋絹裏
 諸繖蓋宋以前皆平頂今加金浮屠。紫方繖制如
 大繖而表以紫羅。紅方繖制如大繖而表以緋羅
 ○華蓋制如繖而圓頂隆起赤質繡雜花雲龍上施
 金浮屠。曲蓋制如華蓋緋瀝水繡瑞草曲柄上施
 金浮屠。導蓋制如曲蓋緋羅瀝水繡龍朱漆直柄
 ○朱繖制如導蓋而無文。黃繖制如朱繖而色黃
 ○葆蓋金塗龍頭竿懸以纓絡銷金圓裙六角葆蓋
 ○孔雀蓋朱漆竿首建小蓋蓋頂以孔雀毛徑尺許
 下垂孔雀尾簷下以青黃紅瀝水圍之上施金浮屠

蓋居竿三之一竿塗以黃金書西天呪語與火輪竿
 義同。朱團扇緋羅繡盤龍朱漆柄金銅飾導駕團
 扇蹙金線。大雉扇制稍長下方而上摺緋羅繡象
 雉尾中有雙孔雀間以雜花下施朱漆橫木連柄金
 銅裝。中雉扇制如大雉扇而减小。小雉扇制如
 中雉扇而减小。青瀝水扇制圓而青色四周瀝水
 以青絹。畢朱滕結網二螭首銜紅絲拂中有獸面
 朱漆柄金銅裝。罕制形如扇朱滕網中有獸面朱
 漆柄金銅裝。旗扇錡即坐也旗錡制十字木于下
 上四枝交拱置竅于其上以樹旗扇錡制如梳形小

六木拱于上而制作精于旗錡並漆以朱。○風伯旗青質赤火焰脚畫神人犬首朱髮鬼形豹汗騰朱袴負風囊立雲氣中。○雨師旗青質赤火焰脚畫神人冠五梁冠朱衣黃袍黑欄黃帶白袴皂舄右手杖劍左手捧鐘。○雷公旗青質赤火焰脚畫神人犬首鬼形白擁項朱犢鼻黃帶右手持斧左手持鑿運連鼓于火中。○電母旗青質赤火焰脚畫神人爲女子形纁衣朱裳白袴兩手運光。○金星旗素質赤火焰脚畫神人冠五梁冠素衣皂欄朱裳秉圭。○水星旗黑質赤火焰脚畫神人冠五梁冠皂衣皂欄綠裳秉圭。

○木星旗青質赤火焰脚畫神人冠五梁冠青衣皂欄朱裳秉圭。○火星旗赤質青火焰脚畫神人冠五梁冠朱衣皂欄綠裳秉圭。○土星旗黃質赤火焰脚畫神人冠五梁冠黃衣皂欄綠裳秉圭。○攝提旗赤質赤火焰脚畫神人冠五梁冠素中單黃衣朱蔽膝綠裳杖劍。○北斗旗黑質赤火焰脚畫七星。○角宿旗青質赤火焰脚畫神人爲女子形露髮朱袍黑欄立雲氣中持蓮荷外伏角亢以下七旗並青質青火焰脚角宿繪二星下繪蛟。○亢宿旗青質赤火焰脚畫神人冠五梁冠素衣朱袍皂欄皂帶黃裳持黑等

子外仗繪四星下繪龍。○氐宿旗青質赤火焰脚畫
神人冠小冠衣金甲朱衣綠包肚朱擁項白袴左手
杖劍乘一鰲外仗繪四星下繪貉。○房宿旗青質赤
火焰脚畫神人烏巾白中單碧袍黑襪朱蔽膝黃帶
黃裙朱舄左手杖劍外仗繪四星下繪兔。○心宿旗
青質赤火焰脚畫神人冠五梁冠朱袍皂襪右手持
杖外仗繪三星下繪狐。○尾宿旗青質赤火焰脚畫
神人冠束髮冠素衣黃袍朱裳青帶右手杖劍左手
持弓外仗繪九星下繪虎。○箕宿旗青質赤火焰脚
畫神人烏巾衣淺朱袍皂襪杖劍乘白馬于火中外
仗繪四星下繪豹。○斗宿旗青質赤火焰脚畫神人
被髮素腰裙朱帶。持杖外仗斗牛以下七旗並
黑質黑火焰脚斗宿繪六星下繪獬。○牛宿旗青質
赤火焰脚畫神人牛首皂襪黃裳皂舄外仗繪六星
下繪牛。○女宿旗青質赤火焰脚畫神人烏牛首衣
朱服皂襪黃帶烏鞞左手持蓮外仗繪四星下繪鼯
。○虛宿旗青質赤火焰脚畫神人被髮裸形坐于甕
中右手持一珠外仗繪二星下繪鼠。○危宿旗青質
赤火焰脚畫神人虎首金甲衣朱服豹皮汗膊青帶
烏鞞外仗上繪三星下繪燕。○室宿旗青質赤火焰

脚畫神人丫髮朱服乘舟水中外仗繪二星下繪猪
○壁宿旗青質赤火焰脚繪神人為女子形被髮朱
服皂襪縵帶白裳烏馬外仗繪二星下繪獮○奎宿
旗青質赤火焰脚繪神人狼首朱服金甲綠包肚白
汗胯黃帶烏鞞杖劍外仗奎婁以下七旗並素質素
火焰脚奎宿繪十六星下繪狼○婁宿旗青質赤火
焰脚繪神人烏巾素衣皂袍朱蔽膝黃帶綠裳烏馬
左手持烏牛角右手杖劍外仗繪三星下繪狗○胃
宿旗青質赤火焰脚繪神人被髮裸形披豹皮白腰
裙黃帶右手杖劍外仗繪三星下繪雉○昂宿旗青

質赤火燄脚繪神人黃牛首朱服皂襪黃裳朱馬左
手持如意外仗繪七星下繪鷄○畢宿旗青質赤火
焰脚繪神人作鬼形朱棍持黑杖乘赤馬行于火中
外仗上繪八星下繪烏○觜宿旗青質赤火焰脚繪
神人冠緇布冠朱服皂襪綠裳持一蓮坐于雲氣中
外仗繪三星下繪猴○參宿旗青質赤火焰脚繪神
人被髮衣黃袍綠裳朱帶朱馬左手持珠外仗上繪
十星下繪猿○井宿旗青質赤火焰脚繪神人烏巾
素衣朱袍皂襪坐于雲氣中左手持蓮外仗井鬼以
下七旗並赤質赤火焰脚井宿繪八星下繪犴○鬼

宿旗青質赤火焰脚繪神人作女子形被髮素衣朱袍黃帶黃裳烏烏右手持杖外仗繪五星下繪羊○柳宿旗青質赤火焰脚繪神人作女子形露髻朱衣黑襪黃裳皂舄撫一青龍外仗繪八星下繪麋○星宿旗青質赤火焰脚繪神人冠五梁冠淺朱袍皂襪青帶黃裳烏烏持黃稱外仗繪七星下繪馬○張宿旗青質赤火焰脚繪神人衣豹皮朱帶素鞞右手杖劍坐于雲氣中外仗繪六星下繪鹿○翼宿旗青質赤火焰脚繪神人冠道冠皂袍黃裳朱蔽膝杖劍履火于雲氣中外仗繪二十二星下繪蛇○軫宿旗青

質赤火焰脚繪神人冠道冠衣朱袍黃帶黃裳左手持書外仗繪四星下繪蚓○日旗青質赤火焰脚繪日于上奉以雲氣○月旗青質赤火焰脚繪月于上奉以雲氣○祥雲旗青質赤火焰脚繪五色雲氣○合璧旗青質赤火焰脚繪雲氣日月○連珠旗青質赤火焰脚繪五星○東嶽旗青質赤火焰脚繪神人冠七梁冠黃襪青袍綠裳白中單素蔽膝執圭○南嶽旗赤質青火焰脚繪神人冠七梁冠黑襪緋袍綠裳黃中單朱蔽膝執圭○中嶽旗黃質赤火焰脚繪神人冠七梁冠皂襪黃袍綠裳白中單朱蔽膝執圭○

西嶽旗白質赤火焰脚繪神人冠七
 赤冠青欄白袍
 緋裳白中單素蔽膝執圭○北嶽旗
 白質赤火焰脚
 繪神人冠七梁冠紅欄皂袍綠裳白中單素蔽膝執
 圭○江瀆旗赤質青火焰脚繪神人冠七梁冠青欄
 朱袍跨赤龍○河瀆旗黑質赤火焰脚繪神人冠七
 梁冠皂欄黃袍跨青龍○淮瀆旗素質赤火焰脚繪
 神人冠七梁冠皂欄素袍乘青鯉○濟瀆旗青質赤
 火焰脚繪神人冠七梁冠皂欄青袍乘一鰲○天下
 太平旗赤質青火焰脚錯采為字○皇帝萬歲旗赤
 質青火焰脚錯采為字○吏兵旗黑質赤火焰脚繪
 神人具甲兜鍪綠臂鞬杖劍○力士旗白質赤火焰
 脚繪神人武士冠緋袍金甲汗膊皂履執戈盾○東
 天王旗青質赤火焰脚繪神人武士冠衣金甲緋襖
 襠右手執戟左手捧塔履石○南天王旗赤質青火
 焰脚繪神人冠服同前○西天王旗白質赤火焰脚
 繪神人冠服同前○北天王旗黑質赤火焰脚繪神
 人冠服同前○大神旗黃質黃火焰脚詳見牙門旗
 下○牙門旗赤質赤火焰脚繪神人冠武士冠鎧甲
 柄襠襠肩包脚汗膊束帶長帶大口袴執戈戟○金
 鼓旗黃質黃火焰脚書金鼓字○朱雀旗赤質赤火

煇脚繪朱雀其形如鸞。玄武旗黑質黑火焰脚繪龜蛇。青龍旗青質赤火焰脚繪蹲龍。白虎旗白質赤火焰脚繪蹲虎。龍君旗青質赤火焰脚繪神人冠通真冠服青繡衣白裙朱履執戟引青龍。虎君旗白質赤火焰脚繪神人冠流精冠服素羅繡衣朱裙朱履執斬蛇劍引白虎。大黃龍負圖旗青質青火焰脚繡複身黃龍背八卦。小黃龍負圖旗赤質青火焰脚繪複身黃龍背八卦。五色龍旗五色質五色直脚無火焰。五色龍旗青赤黃白四色質具火焰脚。小四色龍旗制同大四色直脚無火焰脚。應龍旗赤質赤火焰脚繪飛龍。金鸞旗赤質火焰脚繪鸞而金色。鸞旗制同前而繪以五采。金鳳旗赤質青火焰脚繪鳳而金色。鳳旗制同前而繪以五采。五色鳳旗五色質五色直脚無火焰。大四色鳳旗青赤黃白四色質火焰脚色隨其質繪鳳。小四色鳳旗制同前直脚無火焰。玉馬旗赤質青火焰脚繪白馬兩膊有火焰。馱騾旗赤質青火焰脚繪白馬。飛黃旗赤質赤火焰脚形如馬色黃有兩翼。騶騶旗青質青火焰脚繪獸形如馬白首虎文赤尾。龍馬旗赤質青火焰脚繪龍馬。

麟旗赤質青火焰脚繪麒麟。飛麟旗赤質青火焰脚繪飛麟其形五色身朱翼兩角長爪。黃鹿旗赤質青火焰脚繪獸如鹿而色深黃。兕旗赤質青火焰脚繪獸似牛一角青色。犀牛旗赤質青火焰脚繪獸形如牛金色。白狼旗赤質青火焰脚繪白狼。辟邪旗赤質赤火焰脚繪獸如熊色黃。三角獸旗赤質赤火焰脚繪獸其首類白澤綠髮三角青質白腹跋尾綠色。角端旗赤質赤火焰脚繪獸如羊而小尾頂有獨角。

○騶牙旗赤質青火焰脚繪獸形似麋齒前後一齊。○太平旗赤質青火焰脚金描蓮花四上金書天下太平字。○鷄鵝旗赤質青火焰脚繪鳥似山鷄而小冠背黃腹赤項綠尾紅。○蒼烏旗赤質青火焰脚繪鳥如烏而色蒼。白澤旗赤質赤火焰脚繪獸虎首朱髮而有角龍身。東方神旗綠質赤火焰脚繪神人金兜牟金鎧甲杖劍已下四旗所繪神同西方神旗白質赤火焰脚。中央神旗黃質赤火焰脚。南方神旗赤質青火焰脚。北方神旗黑質赤火焰脚。凡立仗諸旗各火焰脚三條色與質同長一丈五尺杠長二丈

一尺牙門太平萬歲質長一丈橫闊五尺日月龍君
虎君橫豎並八尺餘旗並豎長八尺橫闊六尺。車
輻朱漆八稜施以銅釘形如柯舒。吾杖朱漆金飾
兩末。○鐙杖朱漆棒首標以金塗馬鐙。○及制如稍
而短黑飾兩末中畫雲氣上綴朱絲拂。○骨朶朱漆
棒首貫以金塗銅鎚。○列絲骨朶制如骨朶加紐絲
文。○臥瓜制形如瓜塗以黃金卧置朱漆棒首。○立
瓜制形如瓜塗以黃金立置朱漆棒首。○長刀長丈
有奇闊上窄下單刃。○儀刀制以銀飾紫絲幘鎔。○
橫刀制如儀刀而曲鞘以沙魚皮飾脩革幘鎔。○干
牛刀制如長刀。○劍班鞘飾以沙魚皮劍口兩刃。○
班劍制劍鞘黃質紫班文金銅裝紫絲幘鎔。○刀盾
之刀制如長刀而柄短木爲之青質有環紫絲幘鎔
。○刀盾之盾制以木赤質畫異獸執人右刀左盾。○
朱滕絡盾制同而朱其質。○綠滕絡盾制同而綠其
質。○戟制以木有枝塗以黃金竿以朱漆。○小戟飛
龍掌制如戟畫雲氣上綴飛掌垂五色帶末有銅鈴
掌下方而上兩角微楠繪龍於其上。○釵戟制如戟
無飛掌而有橫木。○稍制以木黑質畫雲氣上刻刃
塗以青五色稍並同而質異。○積制如戟鋒兩旁微

起下有鐔銳。○義制如戟而短青飾兩末中白畫雲氣上綴紅絲拂。○斧雙刃斧貫于朱漆竿首。○鉞金塗鐵鉞單刃腦後繫朱拂朱漆竿。○劈正斧制以玉單刃金塗柄銀鐔。○儀鎗斧制如斧刻木爲之柄以朱上綴小錦幡五色帶。○弓矢。○弩制如弓而有臂。○服前以虎豹皮或暴綠文金銅裝。○鞞制以黑革。○蘭弩矢室。○象鞞鞍五采裝明金木蓮花座緋繡攀鞍條紫繡檐襦紅錦冠。○鍤石蓮花跋塵錦綠檀盤紅犛牛尾纓拂并胃攀鞞攀上各帶紅犛牛尾纓拂。○鍤石胡桃鍤子杏葉鍤具緋皮轡頭鍤具蓮花座上

金塗銀香爐一元初既定占城交趾真獵歲貢象育于析津坊海子之陽行幸則蕃官騎引以導大駕以駕巨輦。○駝鼓設金裝校具花鬘鞍褥橐篋前峯樹皂纛或施采旗後峯樹小旗絡腦當胷後鞞並以毛組爲轡勒五色罐玉毛結纓絡周綴銅鐸小鏡上施一面有底銅捫小鼓一人乘之擊以毛繩凡行幸先鳴鼓于駝以威振遠邇亦以試橋梁伏水而次象焉。○騾鼓制似駝而小。○馬鼓轡勒後勒當胷皆綴紅纓拂銅鈴杏葉校具金塗鈿上插雉尾上負四足小架上施以革鼓一面一人前引凡行幸負鼓于馬以

先馳與纛並行○誕馬纓轡緋涼鍔○御馬鞍轡纓
復全○珂馬銅面雉尾鼻拂曾上綴銅杏葉紅絲拂
又翼前腹下皆有攀綴銅鈴後有跋塵錦包尾

崇天鹵簿

中道○頓迺隊象六飾以金裝道座香寶鞍韉鞅轡
鬪勒犂牛尾拂跋塵鉸具導者六人馭者南越軍六
人皆弓花角唐帽緋絕銷金襖衫鍍金束帶烏鞞橫
列而前行次駝鼓九飾以鍍金鉸具轡飾鬪籠旗鼓
纓槍馭者九人服同馭象者中道相次而行次舍人
二人四品服騎分左右夾駝而行次青衣二人武弁

青絕衫青勒帛青鞞執青杖次清道官四人本品服
騎次信幡二執者二人引護者四人武弁黃絕生色
寶相花袍黃勒帛黃鞞次騾鼓六飾騾以鍍金鉸具
轡鬪籠旗鼓纓槍馭者六人服同馭駝者次告止幡
二執者二人引護者四人武弁緋絕生色寶相花袍
紅勒帛紅鞞次傳教幡二執者二人引護者四人武
弁黃絕生色寶相花袍黃勒帛黃鞞並分左右次橋
道頓迺使一人本品服騎中道舍人清道官橋道頓
迺使從者凡七人錦帽紫襖衫小銀束帶行滕鞋襪
後凡從者之服皆同此○纛稍隊金吾將軍二人交角幟頭緋

羅繡抹額紫羅繡辟邪裋襠紅錦襯袍錦騰蛇金帶
烏鞞橫刀佩符騎分左右次弩騎者五人錦帽青
絕生色寶相花袍銅帶綠雲鞞次稍而騎者五人錦
帽緋絕生色寶相花袍銅帶朱雲鞞次燾一執者一
人夾者四人護者二人皆錦帽紫生色寶相花袍鍍
金帶紫雲鞞押燾官二人皆騎本品服次馬鼓四飾
如騾鼓馭者四人服同御騾次佩弓矢而騎者五人
服同執弩者押衙四人騎而佩劍錦帽紫絕生色寶
相花袍鍍金帶雲頭鞞裸稍者四人騎錦帽緋絕生
色寶相花袍銅帶朱鞞控馬八人錦帽紫衫銀帶烏

鞞次稍而騎者五人服佩同執弩者金吾將軍押燾
官從者四人服同前隊○朱雀隊舍人一人四品服
騎而前次朱雀旗一執者一人引護者四人錦帽緋
絕生色鳳花袍銅帶朱雲鞞皆佩劍而騎護者加弓
矢次金吾折衝一人交角幟頭緋絕繡抹額紫羅繡
辟邪裋襠紅錦襯袍金帶錦騰蛇烏鞞橫刀佩弓矢
而騎帥甲騎凡二十有五弩五人次弓五人次稍五
人次弓五人次稍五人皆冠甲騎冠朱畫甲青勒甲
條鍍金環白繡汗胯束帶紅鞞帶弓箭器仗馬皆朱
甲具裝珂飾全舍人金吾折衝從者凡二人服同前

隊○十二旗隊舍人一人四品服騎而前金吾果毅
二人交角幟頭緋羅繡抹額紫羅繡辟邪衲檔紅錦
襯袍金帶錦騰蛇烏鞞橫刀佩弓矢騎分左右帥引
旗騎士五皆錦帽黃生色寶相花袍銀帶烏鞞次風
伯旗左兩師旗右雷公旗左電母旗右執者四人騎
青甲騎冠綠甲青勒甲條鍍金環白繡汗胯束帶青
雲鞞馬皆青甲珂飾次五星旗五執者五人甲騎冠
五色畫甲青勒甲條鍍金環白繡汗胯束帶五色鞞
馬甲如其甲之色珂飾次北斗旗一執者一人甲騎
冠紫畫甲青勒甲條鍍金環白繡汗胯束帶紫雲鞞

馬甲隨其甲之色珂飾左右攝提旗二執者二人甲
騎冠朱畫甲青勒甲條鍍金環白繡汗胯束帶紅雲
鞞馬朱甲珂飾執副竿者二人騎錦帽黃生色寶相
花袍銀帶烏鞞執稍而護者五人騎服同執副竿者
舍人金吾果毅從者凡三人服同前隊○門旗隊舍
人二人四品服監門將軍二人皆交角幟頭緋純繡
抹額紫羅繡師子衲檔紅錦襯袍金帶烏鞞橫刀佩
弓矢騎馬甲珂飾全次門旗二執者二人錦帽緋純
生色師子文袍銅革帶紅雲鞞劍而騎引護者四人
服佩同執人而加弓矢騎次監門校尉二人騎服佩

同監門將軍分左右行次鸞旗一執者一人引護者
四人錦帽五色純生色瑞鸞花袍束帶五色雲韉佩
劍護人加弓矢皆騎舍人監門將軍監門校尉從者
凡六人服同前隊○雲和樂雲和署令二人朝服騎
分左右引前行凡十有六人戲竹二排簫四簫管二
龍笛二板二歌工四皆展角花幙頭紫純生色雲花
袍鍍金帶紫韉次琵琶二十箏十有六篳篥十有六
箏十有六方響八頭管二十有八龍笛二十有八已
上工百三十有二人皆花幙頭緋純生色雲花袍鍍
金帶朱韉次杖鼓三十工人花幙頭黃生色花襖紅
生色花袍錦臂韉鍍金帶烏韉次板八工人服色同
琵琶工人次大鼓二工十人服色同杖鼓工人雲和
署令從者二人服同前隊○殿中黃麾隊舍人二人
四品服殿中侍御史二人本品服皆騎次黃麾一執
者一人夾者二人騎武弁緋純生色寶相花袍紅勒
帛紅雲韉舍人殿中侍御史從者凡四人服同前隊
○太史鉦鼓隊大史一人本品服騎引交龍柶鼓左
金鉦右舁四人工二人皆武弁緋純生色寶相花袍
紅勒帛紅韉次司辰郎一人左典事一人右並四品
服騎太史司辰郎典事從者三人服同前隊○武衛

釵戟隊武衛將軍一人交角幟頭緋羅繡抹額紫羅
 繡瑞鷹柄襠紅錦襯袍錦騰蛇金帶橫刀騎領五色
 繡旛一金節八罕右畢左朱雀青龍白虎幢三橫布
 導蓋一中道義四武衛果毅二人服佩同武衛將軍
 釵二十戟二十徒五十有九人武弁緋絕生色寶相
 花袍紅勒帛紅鞞武衛將軍武衛果毅從者凡三人
 服同前隊。龍墀旗隊舍人二人四品服中郎將二
 人服佩同釵戟隊武衛將軍騎分左右帥騎士凡二
 十有四人執旗者八人天下太平旗中道中嶽帝旗
 左中央神旗右次日旗左月旗右次祥雲旗二分左

右次皇帝萬歲旗中道執人皆黃絕巾黃絕生色寶
 相花袍黃勒帛黃雲鞞橫刀引者八人青絕巾青絕
 生色寶相花袍青勒帛青雲鞞橫刀執弓矢護者八
 人緋絕巾緋絕生色寶相花袍紅勒帛紅雲鞞橫刀
 執弓矢舍人中郎將從者凡四人服同前隊。御馬
 隊舍人二人四品服引左右衛將軍二人緋羅繡抹
 額紫羅繡瑞馬柄襠紅錦襯袍錦騰蛇金帶烏鞞橫
 刀皆騎分左右行御馬十有二疋分左右飾以纓轡
 鞍複馭士控鶴二十有四人交角金花幟頭紅錦控
 鶴襖金束帶鞞鞋次尚乘奉御二人四品服騎分左

右行舍人左右衛將軍從者四人服同前隊。○拱衛控鶴第一隊拱衛指揮使二人本品服騎分左右帥步士凡二百五十有二人負劍者三十人次執吾杖者五十人次執斧者五十人次執鐙杖者六十人次執列絲骨朶者三十人皆分左右次携金水瓶者一人左金盆者一人右次執列絲骨朶者三十人皆分左右皆金縷額交角幙頭青質孫控鶴襖塗金荔枝東帶鞵鞋拱衛指揮使從者二人服同前隊。○安和樂安和署令二人本品服騎分左右行領押職二人弓角鳳翅金花幙頭紅質孫加襪袍金束帶花鞵次。○鼓八為二重次和鼓一中道次板二次龍笛四次頭管二次羌笛二次笙二次簫二左右行次雲璈一中道工二十有四人皆弓角鳳翅金花幙頭紅錦質孫襖金荔枝束帶花鞵從者二人服同前隊。○金吾援寶隊舍人二人四品服引金吾將軍二人交角幙頭緋羅繡抹額紫羅繡辟邪柄襠紅錦襖袍錦勝蛇橫刀佩弓矢皆騎分左右前引駕十二重甲士一十二騎弩四次弓四次稍四為三重次香案二金爐各二分左右昇士十有六人侍香二人騎而從次典瑞使二人本品服騎而左右引八寶受命寶左傳國

寶右次天子之寶左皇帝之寶右次天子行寶左皇帝行寶右次天子信寶左皇帝信寶右每輿寶盞銷金蒙複襯複案輿紅銷金衣龍頭竿結授昇士八人朱團扇四人凡九十有六人皆交角金花幙頭青紅錦質孫襖每輿前青後紅金束帶鞞鞋授寶三十人交角金花幙頭窄紫衫銷金紅汗胯金束帶烏鞋執金縷黑杖次符寶郎二人四品服騎分左右次金吾果毅二人服佩同金吾將軍騎分左右次稍四人次弓四人次弩四人為三重舍人金吾將軍侍香典瑞使符寶郎金吾果毅從者凡十有二人服同前隊○

殿中繖扇隊舍人二人四品服騎分左右領騎而執旗者四人日月合璧旗左五星連珠旗右次金龍旗左金鳳旗右黃純巾黃純生色寶相花袍黃勒帛黃鞞佩劍騎而引旗者四人青純巾青純生色寶相花袍青勒帛青鞞佩劍執弓矢騎而護旗者四人紅純巾紅純生色寶相花袍紅勒帛紅鞞佩劍執弓矢次朱團扇十有六次小雉扇八次中雉扇八次大雉扇八為十重重四人次曲蓋二紅方繖二次紫方繖二次華蓋二次大繖二執者五十人武弁紅純生色寶相花袍紅勒帛紅鞞舍人從者二人服同前隊○控鶴

圍子隊圍子頭一人執骨朶由中道交角幙頭緋錦質孫襖鍍金荔枝帶鞞鞋領執圍子十有六人分左右交角金花幙頭白襯肩青錦質孫襖鍍金荔枝帶鞞鞋次朱繖中道次金脚踏左金椅右服如圍子頭拱衛指揮使一人本品服騎中道控鶴二十人服同上拱衛指揮使從者二人服同前隊。天樂一部天樂署令二人本品服騎分左右領押職二人弓角鳳翅金花幙頭紅錦質孫襖加襪金束帶花鞞次琵琶二笙篪二火不思二板二箏二胡琴二笙二頭管二龍笛一響鐵一工十有八人徒二人皆弓角鳳翅金

花幙頭紅錦質孫襖鍍金束帶花鞞。控鶴第二隊僉拱衛司事二人本品服騎分左右帥步士凡七十有四人執立瓜者三十有六人分左右次捧金杙一人左鞭桶一人右次蒙鞍一人左繖手一人右次執立瓜者三十有四人分左右皆交角金花幙頭緋錦質孫襖鍍金荔枝帶鞞鞋僉拱衛司事從者二人服同前隊。殿中導從隊舍人二人四品服騎左右引香盤案一黃銷金盤龍衣金爐合結綬龍頭竿昇者十有二人交角金花幙頭紅錦質孫控鶴襖鍍金束帶鞞鞋侍香二人騎分左右次警蹕三人交角幙頭

紫窄袖衫鍍金束帶烏鞞次舍人二人四品服騎引
 天武官二人執金鉞金鳳翅兜牟金鎖甲青勒甲條
 金環繡汗胯金束帶馬珂飾次金骨朶二次幢二次
 節二分左右次金水盆左金椅右次蒙複左副執椅
 右次金水瓶鹿盧左銷金淨巾右次金香毬二金香
 合二分左右次金唾壺左金唾盂右金拂四扇十分
 左右次黃繖中道繖衣從凡騎士三十人服如警蹕
 加白繡汗胯步卒四人執椅二人蒙複一人繖衣一人服如昇香盤
 徒舍人天武官從者凡六人服同前隊。控鶴第三
 隊拱衛直鈐轄二人本品服騎引執卧瓜八十人服

如第二隊。導駕官引進使二人分左右前行次給
 事中一人左起居注一人右侍御史一人左殿中侍
 御史一人右次翰林學士一人左集賢學士一人右
 次御史中丞一人左同知樞密院事一人右次御史
 大夫一人左知樞密院事一人右次侍儀使四人中
 書侍郎二人黃門侍郎二人侍中二人皆分左右次
 儀仗使一人左鹵簿使一人右次禮儀使二人分左
 右持劈正斧一人中道次大禮使一人左太尉一人
 右皆本品服騎從者三十人惟執劈正斧官從者二
 人服同前隊。羽林宿衛舍人二人四品服前行次

羽林將軍二人交角幘頭緋羅繡抹額紫羅繡瑞鷹
衲襠紅錦襯袍錦螭蛇金帶烏鞞橫刀佩弓矢皆騎
分左右領宿衛騎士二十人執骨朶六人次執短戟
六人次執斧八人皆弓角金鳳翅幘頭紫袖細褶辮
線襖束帶烏鞞橫刀舍人羽林將軍從者凡四人服
同前隊○檢校官分布中道之內頓遞隊監察御史二
人本品服次燾稍隊循仗檢校官二人次朱雀隊金
吾中郎將二人皆交角幘頭緋羅繡抹額紫羅繡辟
邪衲襠紅錦襯袍錦螭蛇金帶烏鞞佩儀刀加弓矢
次十二旗隊兵部侍郎二人本品服次門旗隊糾察

儀仗官二人本品服次雲和樂部金吾將軍二人服
佩如金吾中郎將知隊仗官二人本品服次武衛銀
戟隊監察御史二人本品服次外道左右牙門巡仗
監門中郎將二人交角幘頭緋羅繡抹額紫羅繡師
子衲襠紅錦襯袍錦螭蛇金帶烏鞞佩儀刀弓矢次
金吾援寶隊兵部尚書二人次循仗檢校官二人次
殿中繖扇隊監察御史二人次禮部尚書二人皆本
品服次圍子隊知隊仗官二人次金吾大將軍二人
服同金吾將軍各燾稍從次殿中導從隊糾察儀仗
官二人次循仗檢校官二人次羽林宿衛隊左點檢

一人左右點檢一人右紫羅繡瑞麟柄襠餘同金吾
大將軍領大黃龍負圖旗二執者二人夾者八人騎
錦帽五色絕巾五色絕生色雲龍袍塗金束帶五色
雲鞞佩劍夾者加弓矢並行中道控鶴外外仗內前
後檢校仗內知班六人展角幟頭紫窄衫塗金束帶
烏鞞丞奉班都知一人太常博士一人皆朝服騎同
檢校官前後巡察宿直將軍八人服佩同左右點檢
夾輅檢校三衛○陪輅隊誕馬二疋珂飾纓轡青紐
乘黃令二人本品服分左右次殿前將軍二人交角
幟頭緋羅繡抹額紫羅繡辟邪柄襠紅錦襯袍錦騰
蛇金帶烏鞞橫刀騎王輅太僕卿馭本品服千牛大
將軍驂乘交角幟頭紅抹額繡瑞牛柄襠紅錦襯袍
錦騰蛇金帶烏鞞橫刀左右衛將軍服如千牛大將
軍惟柄襠繡瑞虎文陪輅輅馬六疋珂飾纓轡青屨
牽套鞞帶步卒凡八十有二人馭士四人駕士六十
有四人行馬二人踏道八人推竿二人托叉一人梯
一人皆平巾青幘青繡雲龍花袍塗金束帶青鞞教
馬官二人進輅職長二人皆本品服夾輅將軍二人
金鳳翅兜牟金鎖甲條環繡汗騰金束帶綠雲花鞞
青瀝水扇二次千牛備身二人皆分左右交角幟頭

緋羅繡抹額紫羅繡瑞牛襖襠紅錦襯袍金帶烏鞞
橫刀佩弓矢獻官二人殿中監六人內侍十人皆本
品朝服騎分左右千牛備身後騎而執弓矢者十人
尚衣奉御四人尚食奉御二人尚藥奉御二人皆騎
本品服次腰輿黃紵絲銷金雲龍蒙復步卒凡十有
三人舁八人道扇四人黃繖一人皆交角金花幟頭
紅質孫控鶴襖金束帶鞞鞋尚舍奉御二人騎尚輦
奉御二人騎右皆朝服從者三十有四人服同前隊
○大神牙門旗隊都點檢一人騎交角幟頭緋羅繡
抹額紫羅繡瑞麟襖襠紅錦襯袍次監門大將軍二
人分左右騎服如都點檢惟襖襠紫繡獅文門凡三
重親衛郎將帥甲士分左右夾輅而陣繞出輅後合
執斃者二爲第一門翊衛郎將帥護尉夾親衛而陣
繞出輅後合爲第二門監門校尉二人騎左右衛大
將軍帥甲士執五色龍鳳旗夾護尉而陣繞出輅後
合牙門旗二爲第三門監門校尉二人主之服色詳
見外仗○雲和樂後部雲和署丞二人本品服騎分
左右領前行戲竹二排簫二簫管二歌工二凡十人
皆騎花幟頭紫絕生色花袍塗金帶烏鞞次琵琶四
箏四篳篥四箏四頭管六方響二龍笛六杖鼓十二

元史卷二十九
三
四十人皆騎服同上惟絕色紅從者二人服同前隊
後黃麾隊玄武幢一絳麾二徒三人皆武弁紫絕生
色龜雲花袍紫羅勒帛紫鞞次黃麾執者一人夾者
二人皆騎豹尾一執者一人夾者二人皆騎武弁紫
生色寶相花袍紫勒帛紫鞞。玄武黑甲掩後隊金
吾將軍一人騎中道交角幟頭緋羅繡抹額紫羅繡
辟邪兩檔紅錦襯袍金帶錦騰蛇烏鞞佩刀後衛指
揮使二人騎分左右服同各衛指揮使帥一騎五十
有七人玄武旗一執者一人夾者二人小金龍鳳黑
旗二執者二人皆黑兜牟金飾黑甲條環汗胯束帶
鞞帶弓矢器仗馬黑金色獅子甲珂飾稍四十人弩
十人黑兜牟黑甲條環汗胯束帶鞞帶弓矢器仗馬
黑甲珂飾執衛司掾稍二人錦帽紫生色辟邪文袍
鍍金帶烏鞞從者三人服同前隊

外仗

金鼓隊金鼓旗二執者二人引護者八人皆五色絕
巾生色寶相花五色袍五色勒帛鞞佩劍引護者加
弓矢分左右次折衝都尉二人交角幟頭緋羅繡抹
額紫羅繡辟邪兩檔紅錦襯袍金帶錦騰蛇騎帥步
士凡百二十人鼓二十四人鈺二十四人並黃絕巾

黃純生色寶相花袍黃勒帛黃鞞角二十四人紅純
巾紅純生色寶相花袍紅勒帛紅鞞車輻棒二十四
人長刀二十四人並金飾青兜牟青甲條環白繡汗
胯束帶青雲鞞○清游隊舍人二人四品服騎導金
吾折衝二人交角幙頭緋羅繡抹額紫羅繡辟邪柄
襠紅錦襯袍金帶錦騰蛇橫刀佩弓矢騎分左右帥
步士凡百有十人白澤旗二執者二人引護者八人
次執弩二十人次執稍二十人次執弓二十人次執
稍二十人次執弓二十人皆甲騎冠金飾綠畫甲條
環白繡汗胯束帶綠雲鞞佩弓矢器仗馬金飾朱畫
甲珂飾分左右○飲飛隊鐵甲飲飛執稍者十有二
人甲騎冠鐵甲佩弓矢器仗馬鐵甲珂飾次金吾果
毅二人交角幙頭緋純繡抹額紫羅繡辟邪柄襠紅
錦襯袍金帶錦騰蛇橫刀弓矢騎次虞候飲飛執弩
二十人錦帽紅生色寶相花袍塗金帶烏鞞○及仗
隊領軍將軍二人交角幙頭緋純繡抹額紫羅繡白
澤柄襠紅錦襯袍金帶錦騰蛇烏鞞橫刀騎帥步士
五十人執爨二十五人執叉二十五人錯分左右皆
五色純生色巾寶相花五色袍五色勒帛五色雲頭
鞞領軍將軍從者二人錦帽紫袷衫小銀束帶行滕

鞋鞮。○諸衛馬前隊舍人二人。四品服。騎導左右衛
郎將二人。交角幟。頭緋。絕繡。抹額紫。繡瑞馬。襴襜紅。錦
襯袍。金帶。錦騰蛇。烏鞞。橫刀。佩弓矢。騎分左右。帥騎
士百五十有六人。前辟邪旗。左應龍旗。右次玉馬旗。
左三角旗。右次黃龍。負圖旗。左黃鹿旗。右次飛麟旗。
左馱駢旗。右次鸞旗。左鳳旗。右次飛黃旗。左麒麟旗。
右執旗十有二人。生色黃袍。巾勒帛。鞞引旗十有二
人。服同執人。惟袍色青。護旗十有二人。生色紅袍。巾
勒帛。鞞執弓六十人。錦帽。青生色寶相花袍。塗金帶。
烏鞞。執稍六十人。服如執弓者。惟袍色紅。每旗弓五

稍五。從者四人。服同前隊。○二十八宿前隊舍人二
人。四品服。騎導。領軍將軍二人。紫羅繡。白澤。襴襜。餘
如前隊。左右衛郎將皆騎帥。步士百十有二人。前井
宿旗。左參宿旗。右各五盾。從次鬼宿旗。左觜宿旗。右
各五弓。從次柳宿旗。左畢宿旗。右各五盾。從次星宿
旗。左昂宿旗。右各五盾。從次張宿旗。左胃宿旗。右各
五弓。從次翼宿旗。左婁宿旗。右各五殳。從次軫宿旗。
左奎宿旗。右各五盾。從執旗十有四人。生色黃袍。巾
勒帛。鞞引旗十有四人。服如執人。惟袍巾色青。護旗十
有四。人服如執人。惟袍巾色紅。執刀盾者三十人。弓

矢者二十人積者二十人皆五色兜牟甲條環白繡
汗騰束帶五色雲鞞舍人領軍將軍從者四人服同
前隊○領軍黃麾仗前隊舍人二人四品服騎導領
軍將軍二人服佩如二十八宿旗隊領軍將軍騎分
左右帥步士凡一百五十人絳引旛十次龍頭竿繡
斿十皆分左右次江瀆旗左濟瀆旗右次小戟十次
弓十皆分左右次南方神旗左西方神旗右次鏜十
次綠騰絡盾加刀十皆分左右次南岳帝旗左西岳
帝旗右次龍頭竿斿十次朱騰絡盾加刀十皆分左
右次南天王旗左西天王旗右次小戟十次弓十皆
分左右次龍君旗左虎君旗右次鏜十次綠騰絡盾
加刀十皆分左右執人一百三十人武弁五色生色
寶相花袍勒帛鞞引旗十人青生色寶相花袍巾勒
帛鞞護旗十人服同惟袍巾色紅○及仗後隊領軍
將軍二人騎帥步士凡五十人及二十有五義二十
有五錯分左右服佩同前隊○左右牙門旗隊監門
將軍二人騎紫繡獅子柄襠餘如及仗隊領軍將軍
之服佩次牙門旗四每旗執者一人引夾者二人並
黃純巾黃純生色寶相花袍黃勒帛黃雲鞞皆騎次
監門校尉二人騎服佩同監門將軍從者四人服同

前隊。左右青龍白虎隊舍人二人四品服騎導領軍將軍二人服佩同及仗隊之領軍將軍騎分左右帥甲士凡五十有六人騎青龍旗左執者一人夾者二人從以執弩五人弓十人稍十人皆冠青甲騎冠青鐵甲青條金環束帶白繡汗膊青雲鞞白虎旗右執者一人夾者二人從以執弩五人弓十人稍十人皆冠白甲騎冠白鐵甲青條金環束帶白繡汗膊白雲鞞舍人領軍將軍從者四人服同前隊。二十八宿後隊舍人二人四品服騎導領軍將軍二人騎分左右帥步士百十有二人角宿旗左壁宿旗右從以

執弓者五人次亢宿旗左室宿旗右各從以執殳者五人次氐宿旗左危宿旗右各從以執盾者五人次房宿旗左虛宿旗右各從以執弓者五人次心宿旗左女宿旗右各從以執殳者五人次箕宿旗左斗宿旗右各從以執弓者五人舍人領軍將軍從者四人執夾引從服佩皆同前隊。諸衛馬後隊舍人二人四品服騎導左右衛果毅都尉二人騎分左右帥衛士百五十有六人角端旗左赤熊旗右次兕旗左太平旗右次驪騮旗左騶牙旗右次犀牛旗左駿驎旗右次蒼

烏旗左白狼旗右次龍馬旗左金牛旗右舍人左右衛果毅都尉從者四人執夾引從服佩同前隊。○左右領軍黃麾後隊舍人二人四品服騎導領軍將軍二人騎分左右帥步士百六十人龍頭斃十次朱勝絡盾加刀十皆分左右次吏兵旗左力士旗右次小戟十次弓十皆分左右次東天王旗左北天王旗右次鏗十次綠勝絡盾加刀十皆分左右次東岳帝旗左北岳帝旗右次龍頭竿斃十次朱勝絡盾加刀十皆分左右次東方神旗左北方神旗右次小戟十次弓十皆分左右淮瀆旗左河瀆旗右次鏗十次綠勝

絡盾加刀十皆分左右次絳引幡十分左右掩後舍人領軍將軍從者四人執夾服佩並同前隊。○左右衛儀刀班劍隊舍人二人四品服騎導左右衛中郎將二人交角幘頭緋羅繡抹額紫羅繡瑞馬柄檔紅錦襯袍錦騰蛇金帶烏鞞騎分左右帥步士凡四十八人班劍二十人儀刀二十人並錦帽紅生色寶相花袍塗金束帶烏鞞舍人左右衛中郎將從者四人服同前隊。○供奉宿衛步士隊供奉中郎將二交角幘頭緋羅繡抹額紫羅繡瑞馬柄檔紅錦襯袍錦騰蛇金帶烏鞞橫力佩弓矢騎分左右帥步士凡五十有

人左黑鳳旗五人右次五色鳳旗二十五居左五色龍旗二十五居右曲繞輅後合牙門旗為第三門士皆冠甲騎冠金飾朱畫甲青勒甲條鍍金環白繡汗胯紅鞞佩弓矢器仗馬青金毛獅子甲珂飾。○左衛青甲隊左衛指揮使二人騎服紫羅繡雕虎袖襠餘同左右衛大將軍帥騎士三十有八人執大青龍旗一人左大青鳳旗一人右次小青龍旗一人左小青鳳旗一人右次大青鳳旗一人左大青龍旗一人右每旗從以持青稍者四人次小青鳳旗一人左小青龍旗一人右皆從以持青稍者三人皆青兜牟金飾

青畫甲青條塗金環汗胯束帶鞞佩弓矢器仗馬青金毛獅子甲珂飾折繞陪門。○前衛赤甲隊前衛指揮使二人騎服佩同左衛指揮使帥騎士凡四十有八人執大赤鳳旗一人左大赤龍旗一人右次小赤鳳旗一人左小赤龍旗一人右次大赤龍旗一人左大赤鳳旗一人右每旗從以持朱稍者四人次執大赤鳳旗一人左大赤龍旗一人右皆從以持朱稍者三人皆朱兜牟金飾朱畫甲條環汗胯束帶鞞佩弓矢器仗馬朱甲珂飾從者二人服同前隊折繞陪門。○中衛黃甲

隊中衛指揮使二人騎服同前衛指揮使帥騎士凡
五十有八人執大黃龍旗一人左大黃鳳旗一人右
次小黃龍旗一人左小黃鳳旗一人右次大黃鳳旗
一人左大黃龍旗一人右次小黃鳳旗一人左小黃
龍旗一人右次大黃龍旗一人左大黃鳳旗一人右
每旗從以持黃稍者四人次小黃龍旗一人左小黃
鳳旗一人右皆從以持黃稍者三人皆黃纛牟金飾
黃甲條環汗胯束帶鞞佩弓矢器仗馬甲珂飾從者
二人服同前隊折繞陪門○右衛白甲隊右衛指揮
使二人騎服同中衛指揮使帥騎士凡七十有四人

執大白鳳旗一人左大白龍旗一人右次小白鳳旗
一人左小白龍旗一人右次大白龍旗一人左大白
鳳旗一人右次小白龍旗一人左小白鳳旗一人右
次大白鳳旗一人左大白龍旗一人右每旗從以持
白稍者四人次小白鳳旗一人左小白龍旗一人右
次大白龍旗一人左大白鳳旗一人右皆從以持白
稍者五人皆纛牟金飾白條環汗胯束帶鞞佩弓
矢器仗馬白甲珂飾從者二人服同前隊折繞陪門
○牙門四監門中郎將二人服佩同各衛指揮使騎
分左右次左衛次前衛次中衛次右衛牙門旗各二

色並赤監門校尉各二人均服佩同各衛之執旗者
從者十人服同前隊

志卷第二十九

志卷第二十九

元史八十

翰林待制承直郎同知制誥兼國史院編修官王禕等奉
勅修

輿服三

儀衛

殿上執事

挈壺郎二人掌直漏刻冠學士帽服紫羅窄袖衫塗
金束帶烏鞞漏刻直御榻南○司香二人掌侍香以
主服御者國語曰速攝之冠服同挈壺香案二在漏
刻東西稍南司香侍案側東西相向立○酒人凡六十

人主酒國語曰二十人主漣國語曰二十人主膳國語曰

曰博二十人冠唐帽服同司香酒海直漏南酒人北

面立酒海南○護尉四十人以質子在宿衛者攝之

質子國語曰冠交角幘頭紫梅花羅窄袖衫塗金束

帶白錦汗騰帶弓矢佩刀執骨朶分立東西宇下○

警蹕三人以控鶴衛士為之冠交角幘頭服紫羅窄

袖衫塗金束帶烏靴捧立于露階每乘輿出入則鳴

其鞭以警衆

司香二人亦以主服御者攝之冠服同殿上司香香

案直露階南司香東西相向立護尉凡四十人以戶

郎國語曰二十人質子二十人攝之服同宇下護尉

夾立階阼右階之下伍長凡六人都點檢一人右點

檢一人左點檢一人凡宿衛之人及諸門者戶者皆

屬焉如怯薛之類是也殿內將軍一人凡殿內佩

弓矢者佩刀者諸司禦者皆屬焉如火兒赤温都殿

外將軍一人宇下護尉屬焉宿直將軍一人黃麾立

仗及殿下護尉屬焉右無常官凡朝會則以近侍重

臣攝之服白帽白衲襖行滕履襪或服其品之公服

點檢以瑪瑙左點檢以水精殿內將軍以馬瑙殿外
將軍以水精宿直將軍以金○左階之下伍長凡三
人殿內將軍一人殿外將軍一人宿直將軍一人冠
服同右恭事則侍立舍人授以骨朶而易笏殿內將
軍以瑪瑙殿外將軍以水精宿直將軍以金○司辰
郎二人一人立左樓上服視六品候時北面而鷄唱
一人立樓下服視八品候時捧牙牌趨丹墀跪報露
階之下左黃麾仗內設表案一禮物案一輿士凡八
人每案四人前二人冠縷金額交角幘頭緋錦寶相
花窄袖襖塗金束帶行滕鞋襪後二人冠服同前惟

襖色青○圍人十人國語曰阿塔赤冠唐巾紫羅窄袖衫青

錦緣白錦汗騰銅束帶烏靴馭立仗馬十覆以青錦
緣緋錦鞍復分左右立黃麾仗南○侍儀使二人引
進使一人通班舍人一人尚引舍人一人閱仗舍人
一人奉引舍人一人先輿舍人一人糾儀官凡四人
尚書一人侍郎一人監察御史二人知班三人視班
內失儀者白糾儀官而行罰馬皆東向立右仗之東
以北為上○侍儀使二人引進使一人承奉班都知
一人宣表目舍人一人宣表脩撰一人宣禮物舍人
一人奉表舍人一人奉幣舍人一人尚引舍人一人

閱仗舍人一人奉引舍人一人先輿舍人一人押禮
 物官凡二人工部侍郎一人禮部侍郎一人糾儀官
 凡四人尚書二人侍郎一人監察御史二人知班三
 人視班內如左右輦路宣贊舍人一人通贊舍人一
 人戶郎二人承傳贊席前皆西向立左仗之西以北
 為上凡侍儀使引進使尚書侍郎御史各服其本品
 之服承奉班都知舍人借四品服知班冠展角幘頭
 服紫羅窄袖衫塗金束帶烏靴○護尉三十人以贊
 子在宿衛者攝之立大明門闌外冠服同宇下護尉
 ○承傳二人控鶴衛士為之立大明門楹間以承傳

于外仗冠服同警蹕執金柄小骨朶

殿下黃麾仗

黃麾仗凡四百四十有八人分布于丹墀左右各五行

右前列執大蓋二人執華蓋二人執紫方蓋二人執
 紅方蓋二人執曲蓋二人冠展角幘頭服緋絕生色寶
 相花袍勒帛烏靴○次二列執朱團扇八人執大雉
 扇八人執中雉扇八人執小雉扇八人執朱團扇八
 人冠武弁服同前執蓋者○次三列執黃麾幡十人
 武弁青絕生色寶相花袍青勒帛烏靴執絳引幡十
 人武弁緋絕生色寶相花袍緋勒帛烏靴執信幡十
 人冠服同上其色黃執傳教幡十人冠服同上其色

白執告止幡十人冠服同上其色紫。次四列以下
 執葆蓋四十人服緋服緋純生色寶相花袍勒帛烏
 靴執儀鎗斧四十人冠服同上其色黃執小戟蛟龍
 掌四十人冠服同上其色青左列亦如之皆以北為
 上押仗四人行視仗內而檢校之冠服同警蹕者

旗仗執護引屏凡五百二
有八人分左右以列

左前列建天下太平旗第一牙門旗第二每旗執者
 一人護者四人皆五色緋巾五色純生色寶相花袍
 勒帛雲頭靴執人佩劍護人加弓矢後屏五人執稍
 朱兜鍪朱甲雲頭靴。左二列日旗第三龍君旗第

四每旗執者一人護者四人後屏五人巾服執佩同
 前列。右前列建皇帝萬歲旗第一牙門旗第二每
 旗執者一人護者四人後屏五人巾服執佩同左前
 列。右二列月旗第三虎君旗第四每旗執者一人
 護者四人後屏五人巾服執佩同前列。左次三列
 青龍旗第五執者一人黃純巾黃純生色寶相花袍
 勒帛花靴佩劍護者二人朱白二色純巾二色純生
 色寶相花袍勒帛花靴佩劍加弓矢天王旗第六執
 者一人巾服同上護者二人青白二色純巾二色生
 色寶相花袍勒帛花靴佩劍加弓矢後屏五人執稍

朱堦鍪朱甲雲頭靴風伯旗第七執者一人護者二人後屏五人巾服佩執同天王旗兩師旗第八執者一人護者二人後屏五人巾服佩執同青龍旗雷公旗第九執者一人巾服佩同上護者二人青紫二色純巾二色純生色寶相花袍勒帛花靴佩劍加弓矢後屏五人執稍黃堦鍪黃甲雲頭靴。右次三列白虎旗第五執者一人黃純巾黃純生色寶相花袍勒

帛花靴佩劍護者二人青朱二色純巾二色純生色寶相花袍勒帛花靴佩劍加弓矢後屏五人執稍朱堦鍪朱甲雲頭靴江瀆旗第七執者一人護者二人後屏五人巾服佩執同天王旗河瀆旗第八執者一人巾服佩同上護者二人青紫二色純巾二色純生色寶相花袍勒帛花靴佩劍加弓矢後屏五人執稍黃堦鍪黃甲雲頭靴淮瀆旗第九執者一人巾服佩同上護者二人青朱二色純生色寶相花袍勒帛花靴佩劍加弓矢後屏五人巾服佩執同白虎旗濟瀆旗第十執者一人巾服佩同上護者二人朱白二色

純巾二色純生色寶相花袍勒帛花靴佩劍加弓矢
 後屏五人執稍青兜鍪青甲雲頭靴力士旗第十一
 執者一人護者二人後屏五人巾服佩執同河瀆旗
 二十二旗內拱衛直指揮使二人分左右立服本品
 朝服執玉斧次卧瓜一列次立瓜一列次列絲一列
 冠縷金額交角幘頭緋錦寶相花窄袖襖塗金荔枝
 束帶行滕履襪次鎧仗一列次吾仗一列次班劍一
 列並分左右立冠縷金額交角幘頭青錦寶相花窄
 袖襖塗金荔枝束帶行滕履襪。左次四列朱雀旗
 第十二執者一人并純巾黃純生色寶相花袍勒帛

花靴佩劍護者二人青白二色純巾二色純生色寶
 相花袍勒帛花靴佩劍加弓矢後屏五人執稍朱兜
 鍪朱甲雲頭靴木星旗第十三執者一人巾服佩同
 上護者二人青朱二色純巾二色純生色寶相花袍
 勒帛花靴佩劍加弓矢後屏五人執稍青兜鍪青甲
 雲頭靴熒惑旗第十四執者一人巾服佩同上護者
 二人青紫二色純巾二色純生色寶相花袍勒帛花
 靴佩劍加弓矢後屏五人巾服執佩同朱雀旗土星
 旗第十五執者一人護者二人巾服佩同熒惑旗後
 屏五人執稍黃兜鍪黃甲雲頭靴太白旗第十六執

者一人護者二人巾服佩同木星旗後屏五人執稍
 白兜鍪白甲雲頭靴水星旗第十七執者一人護者
 二人服佩同太白旗後屏五人執稍紫兜鍪紫甲雲
 頭靴鸞旗第十八執者一人巾服佩同上護者二人
 朱白二色純巾二色純生色寶相花袍勒帛花靴佩
 劍加弓矢後屏五人巾服執同木星旗。右次四列
 玄武旗第十二執者一人黃純巾黃純生色寶相花
 袍勒帛花靴佩劍護者二人朱白二色純巾二色純
 生色寶相花袍勒帛花靴佩劍加弓矢後屏五人紫
 兜鍪
 雲頭靴執稍東嶽旗第十三執者一人護

者二人巾服佩同玄武旗後屏五人執稍青兜鍪青
 甲雲頭靴南嶽旗第十四執者一人巾服佩同上護
 者二人青白二色純巾二色純生色寶相花袍勒帛
 花靴佩劍加弓矢後屏五人執稍朱兜鍪朱甲中嶽
 旗第十五執者一人巾服佩同上護者二人紫青二
 色純巾二色純生色寶相花袍勒帛花靴佩劍加弓
 矢後屏五人執稍黃兜鍪黃甲雲頭靴西嶽旗第十
 六執者一人巾服佩同上護者二人朱青二色純巾
 二色純生色寶相花袍勒帛花靴佩劍加弓矢後屏
 五人執稍白兜鍪白甲北嶽旗第十七執者一人護

者二人巾服佩同南嶽旗後屏五人巾服執同玄武
旗麟旗第十八執者一人護者二人後屏五人巾服
執佩同西嶽旗○左次五列角宿旗第十九亢宿旗
第三十氏宿旗第二十一房宿旗第二十二心宿旗
第三十三尾宿旗第二十四箕宿旗第二十五每旗
執者一人黃純巾黃純生色寶相花袍勒帛花靴佩
劍護者二人青朱二色純巾二色純生色寶相花袍
勒帛花靴佩劍加弓矢後屏五人青堯鑿青甲執稍
○右次五列奎宿旗第十九婁宿旗第二十胃宿旗第
二十一昂宿旗第二十二畢宿旗第二十三觜宿旗

第二十四參宿旗第二十五每旗執者一人黃純巾
黃純生色寶相花袍勒帛花靴佩劍護者二人青朱
二色純巾二色純生色寶相花袍勒帛花靴佩劍加
弓矢後屏五人執稍白堯鑿白甲○左次六列斗宿
旗第二十六牛宿旗第二十七女宿旗第二十八虛
宿旗第二十九危宿旗第三十室宿旗第三十一壁
宿旗第三十二每旗執者一人黃純巾黃純生色寶
相花袍勒帛花靴佩劍護者二人朱白二色純巾二
色純生色寶相花袍勒帛花靴佩劍加弓矢後屏五
人執稍紫堯鑿紫甲○右次六列井宿旗第二十六

鬼宿旗第二十七柳宿旗第二十八星宿旗第二十
九張宿旗第三十翼宿旗第三十一軫宿旗第三十
二每旗執者一人黃純巾黃純生色寶相花袍勒帛
花靴佩劍護者二人朱白二色純巾二色純生色寶
相花袍勒帛花靴佩劍加弓矢後屏五人執稍朱堦
鍪朱甲

宮內導從

警蹕三人以控鶴衛士為之並列而前行掌鳴其鞭
以警衆前服見○天武二人執金鉞分左右行金堦鍪金
甲蹙金素汗膝金束帶綠雲靴○舍人二人服視四

品○主服御者凡三十人速古兒執骨乃尔二人執幢

二人執節二人皆分左右行携金盆一人由左負金

椅一人由右携金水瓶鹿盧一人由左執巾一人由

右捧金香毬二人捧金香合二人皆分左右行捧金

唾壺一人由左捧金唾盂一人由右執金拂四人執

升龍扇十人皆分左右行冠交角幘頭服紫羅窄袖

衫塗金束帶烏靴○劈正斧官一人由中道近侍重

臣攝之侍儀使四人分左右行○佩弓矢十人國語

兒赤分左右由外道行服如主服御者○佩寶刀十人

溫國語都赤分左右行冠鳳翅唐巾服紫羅辯線襖金束

帶烏鞞

中宮導從

舍人二人引進使二人中政院判二人同僉中政院事二人僉中政院事二人中政院副使二人同知中政院事二人中政院使二人皆分左右行各服其本品公服內侍二人分左右行服視四品○押直二人冠交角幘頭紫羅窄袖衫塗金束帶烏鞞小內侍凡九人執骨朶二人執葆蓋四人皆分左右行執繖一人由中道行携金盆一人由左負金椅一人由右服紫羅團花窄袖衫冠帶鞞如押直○中政使一人由

中道捧外辦象牌服本品朝服○宮人凡二十人携水瓶金鹿盧一人由右執銷金淨巾一人由左捧金香毬二人捧金香合二人分左右捧金唾壺一人由左捧金唾盂一人由右執金拂四人執雉扇十人各分左右行冠鳳翅縷金帽銷金緋羅襖銷金緋羅結子銷金緋羅繫腰紫羅衫五色嵌金黃雲扇瓊玉束帶

進發冊寶

清道官二人警蹕二人並分左右皆攝官服本品朝服○雲和樂一部署令二人分左右次前行戲竹二

次排簫四次簫管四次板二次歌四並分左右前行
內琵琶二十次箏十六次篪十六次箏十六次方
響八次頭管二十八次龍笛二十八為三十三重重四
次杖鼓三十為八重次板八為四重板內大鼓二工
二人舁八人樂工服並與鹵簿同法物庫使二人服
本品服次朱團扇八為二重次小雉扇八次中雉扇
八次大雉扇八分左右為十二重次朱團扇八為二
重次大繖二次華蓋二次紫方繖二次紅方繖二次
曲蓋二並分左右執繖扇所服並同立仗○圍子頭
一人中道次圍子八人分左右服與鹵簿內同○安

和樂一部署令二人服本品服扎鼓六為二重前四
後二次和鼓一中道次板二分左右次龍笛四次頭
管四並為二重次羗管二次笙二並分左右次雲璈
一中道次箏二分左右樂工服與鹵簿內同○繖一
中道椅左踏右執人皂巾大團花緋錦襖金塗銅束
帶行滕鞋襪○拱衛使一人服本品服○舍人二人
次引寶官二人並分左右服四品服○香案中道輿
士控鶴八人服同立仗內表案輿士侍香二人分左
右服四品服○寶案中道輿士控鶴十有六人服同
香案輿士方輿官三十人夾香案寶案分左右而趨

至殿門則控鶴退方輿官舁案以陞唐巾紫羅窄袖衫金塗銅束帶烏靴。引冊二人四品服。香案中道輿士控鶴八人服同寶案輿士侍香二人分左右服四品服。冊案中道輿士控鶴十有六人服同寶案輿士方輿官三十人夾香案冊案分左右而趨至殿門則控鶴退方輿官舁案以陞巾服與寶案方輿官同。葆蓋四十人次闕仗舍人二人服四品服次小戟四十人次儀鎧四十人夾雲和樂繖扇分左右行服同立仗。拱衛使二人服本品朝服次班劍十次梧杖十二次斧十二次鐙仗二十次列繚十皆分左

右次水瓶左金盆右次列繚十次立瓜十次金杙左鞭桶右蒙鞍左繖手右次立瓜十次卧瓜三十並夾葆蓋小戟儀鎧分左右行服並同鹵簿內。拱衛外舍人二人服四品服引導冊諸官次從九品以上次從七品以上次從五品以上並本品朝服。金吾折衝二人牙門旗二每旗引執五八次青稍四十人赤稍四十人黃稍四十人白稍四十人紫稍四十人並兜鍪甲靴各隨稍之色行導冊官外。冊案後舍人二人服四品服次太尉右司徒左次禮儀使二人分左右次舉冊官四人右舉寶官四人左次讀冊官二

三百五十八
元史卷三十一
人右讀寶官二人左次閣門使四人分左右並本品服。知班六人分左右服同立仗往來視諸官之失儀者而行罰焉。

上尊號冊寶凡攝官二百十有六人奉冊官四人奉寶官四人捧冊官二人捧寶官二人讀冊官二人讀寶官二人引冊官五人引寶官五人典瑞官三人糾儀官四人殿中侍御史二人監察御史四人閣門使三人清道官四人點試儀衛五人司香四人備顧問七人代禮三十人拱衛使二人押仗二人方輿一百

六十人。○上皇太后冊寶凡攝官百五十人攝太尉一人攝司徒一人禮儀使四人奉冊官二人奉寶官二人引冊官二人引寶官二人舉冊官二人舉寶官二人讀冊官二人讀寶官二人捧冊官二人捧寶官二人奏中嚴一人主當內侍十人閣門使六人充內臣十三人糾儀官四人代禮官四十二人掌謁四人司香十二人折衝都尉二人拱衛使二人清道官四人警蹕官四人方輿官百二十人。○太皇太后冊寶攝官同前。○授皇后冊寶凡攝官百八十人攝太尉一人攝司徒一人主節官二人禮儀使四人奉冊官

二人奉寶官二人引冊官二人引寶官二人舉冊官
 二人舉寶官二人讀冊官二人讀寶官二人內臣職
 掌一人宣徽使二人閣門使二人代禮官三十七人
 侍香二人清道官四人折衝都尉二人警蹕官四人
 中宮內臣九人糾儀官四人接冊內臣二人接寶內
 臣二人方輿官七十四人○授皇太子冊凡攝官四
 十有九人攝太尉一人奉冊官二人持節官一人捧
 冊官二人讀冊官二人引冊官二人攝禮儀使二人
 主當內侍六人副持節官五人侍從官十一人代禮
 官十六人

班序

先期侍儀使糾庀陳設○殿內兩楹北香案二○殿
 門內殿內將軍板位二其外殿外將軍板位二字下
 斜界護尉板位二軒溜前斜外出畫白蓮六右點檢
 板位三左宣徽板位三蓮南一步橫列鳴鞭板位三
 左右階南兩隅天武板位二字下左右第二第三重
 斜界導從板位二○殿東門兩碩斜界出導從二道
 三層各圈十五先扇錡各五寶蓋錡各二○殿東階
 下各圈十直至東門階下為回倒導從位正階下二
 十四甃香案一護尉席內各祀迤內第四螭首取直

邊北左右護尉第五席相向布席北二席宿直次殿
中次典瑞次起居每席函丈五尺設。殿前板位八
各以左右祀道內邊丹墀連內第五甍縱直北空路
五丈五尺東西走路各違四丈九尺中布席四十席
函九尺設護尉板位二輦路東西各五道表二丈一
仞五寸南北兩道廣丈有奇北至道當中第一北三
南一自兩端各函六丈第二北起十一各函丈咫南
起九各函丈三尺第三北起十三各函丈五尺南起
十二各函丈五寸第四北起十六各函丈二尺南起
十四各函九尺第五北起同上南起各函八尺北頭

曲尺路內各函九尺設黃麾仗錡二百二十仗南畫
闌約丈許左右同中央置席設尚廡板位二仗內丹
墀橫界一十八道道函五尺縱引橫引三丈中設九
品板位一十八尚廡南左右縱畫各一十八道道函
仞左右向設起居旁折板位三十六以內爲上。大
明門中兩楹外斜界二道護尉板位二外設管旗板
位二門下左右闕邊各六丈南北各畫一道廣一引
七丈一仞六寸空各二丈一仞內橫二引二丈五寸
空各三丈五尺每錡後丈五尺屏風渠一道長五尺
坐各違四壁丈五尺設牙旗錡七十四闕下兩觀內

各六丈縱各界一十八道道遠仞左右設外序班板
位三十六自序班北入闕左右門邊兩外仗徃北折
西至月華門東至日精門道中央入至起居旁折界
一道導引



志卷第三十

志卷第三十一

元史八十一

翰林學士雷奕知制誥兼修國史臣宋濂翰林待制承直郎兼國史院編修官臣王禕等奉

勅修

選舉一

選舉之法尚矣成周庠序學校以鄉三物教萬民而
賓興之舉於卿升於司徒司馬論定而後官之兩漢
有賢良方正孝弟力田等科或奉對詔策事猶近古
隋唐有秀才明經進士明法明算等科或兼用詩賦
士始有棄本而逐末者宋大興文治專尚科目雖當
時得人爲盛而其弊遂至文體卑弱士習委靡識者

病焉遼金居北方俗尚弓馬遼景宗道宗亦行貢試
金太宗世宗屢闢科場亦粗稱得士元初太宗始得
中原輒用耶律楚材言以科舉選士世祖既定天下
王鶚獻計許衡立法事未果行至仁宗延祐間始斟
酌舊制而行之取士以德行為本試藝以經術為先
士襃然舉首應上所求者皆彬彬輩出矣然當時仕
進有多岐銓衡無定制其出身於學校者有國子監
學有蒙古字學回回國學有醫學有陰陽學其策名
於薦舉者有遺逸有茂異有求言有進書有童子其
出於宿衛勲臣之家者待以不次其用於宣徽中政

之屬者重為內官文廢叙有循常之格而超擢有選
用之科由直省侍儀等入官者亦名清望以倉庾賦
稅任事者例視冗職捕盜者以功叙入粟者以貲進
至工匠皆入班資而輿隸亦躋流品諸王公主寵以
投下俾之保任遠夷外徼授以長官俾之世襲凡若
此類殆所謂吏道雜而多端者歟矧夫儒有歲貢之
名吏有補用之法曰掾史令史曰書寫銓寫曰書吏
典吏所設之名未易枚舉曰省臺院部曰路府州縣
所入之途難以指計雖名卿大夫亦徃徃由是躋要
官受顯爵而刀筆下吏遂致竊權勢舞文法矣故其

銓選之備考覈之精曰隨朝外任曰省選部選曰文官武官曰考數曰資格一毫不可越而或援例或借資或優陞或回降其縱情破律以公濟私非至明者不能察焉是皆文繁吏弊之所致也今採摭舊編載於簡牘或詳或畧條分類聚殆有不勝其紀述者姑存一代之制作選舉志

科目

太宗始取中原中書令耶律楚材請用儒術選士從之九年秋八月下詔命斷事官朮忽解與山西東路課稅所長官劉中歷諸路考試以論及經義詞賦分

為三科作三日程專治一科能兼者聽但以不失文義為中選其中選者復其賦役令與各處長官同署公事得東平楊英等凡若干人皆一時名士而當世或以為非便事復中止世祖至元初年有旨命丞相史天澤條具當行大事嘗及科舉而未果行四年九月翰林學士承旨王鶚等請行選舉法遠述周制次及漢隋唐取士科目近舉遼金選舉用人與本朝太宗得人之効以為貢舉法廢士無入仕之階或習刀筆以為吏胥或執僕役以事官僚或作技巧販鬻以為工匠商賈以今論之惟科舉取士最為切務矧先

朝故典尤宜追述奏上帝曰此良法也其行之中書
左三部與翰林學士議立程式又請依前代立國學
選蒙古人諸職官子孫百人專命師儒教習經書俟
其藝成然後試用庶幾勲舊之家人材輩出以備超
擢十一年十一月裕宗在東宮時省臣復啓謂去年
奉旨行科舉今將翰林老臣等所議程式以聞奉令
旨准蒙古進士科及漢人進士科參酌時宜以立制
度事未施行至二十一年九月丞相火魯火孫與留
夢炎等言十一月中書省臣奏皆以爲天下習儒者
少而由刀筆吏得官者多帝曰將若之何對曰惟貢

舉取士爲便凡蒙古之士及儒吏陰陽醫術皆令試
舉則用心爲學矣帝可其奏繼而許衡亦議學校科
舉之法罷詩賦重經學定爲新制事雖未及行而選
舉之制已立至仁宗皇慶二年十月中書省臣奏科
舉事世祖裕宗累嘗命行成宗武宗尋亦有旨今不
以聞恐或有沮其事者夫取士之法經學實修已治
人之道詞賦乃摘章繪句之學自隋唐以來取人專
尚詞賦故士習浮華今臣等所擬將律賦省題詩小
義皆不用專立德行明經科以此取士庶可得人帝
然之十一月乃下詔曰惟我祖宗以神武定天下世

祖皇帝設官分職徵用儒雅崇學校為育材之地議
科舉為取士之方規模宏遠矣朕以眇躬獲承丕祚
繼志述事祖訓是式若稽三代以來取士各有科目
要其本末舉人宜以德行為首試藝則以經術為先
詞章次之浮華過實朕所不取爰命中書參酌古今
定其條制其以皇慶三年八月天下郡縣興其賢者
能者充賦有司次年二月會試京師中選者朕將親
策焉具合行事宜于后科場每三歲一次開試舉人
從本貫官司於諸色戶內推舉年及二十五以上鄉
黨稱其孝悌朋友服其信義經明行修之士結罪保

舉以禮敦遣員諸路府其或徇私濫舉并應舉而不
舉者監察御史肅政廉訪司體察究治考試程式蒙
古色目人第一場經問五條大學論語孟子中庸內
設問用朱氏章句集註其義理精明文辭典雅者為
中選第二場策一道以時務出題限五百字以上漢
人南人第一場明經經疑二問大學論語孟子中庸
內出題並用朱氏章句集註復以己意結之限三百
字以上經義一道各治一經詩以朱氏為主尚書以
蔡氏為主周易以程氏朱氏為主已上三經兼用古
註疏春秋許用三傳及胡氏傳禮記用古註疏限五

百字以上不拘格律第二場古賦詔誥章表內科一道古賦詔誥用古體章表四六參用古體第三場策一道經史時務內出題不矜浮藻惟務直述限一千字以上成蒙古色目人願試漢人南人科目中選者加一等注授蒙古色目人作一榜漢人南人作一榜第一名賜進士及第從六品第二名以下及第二甲皆正七品第三甲以下皆正八品兩榜並同所在官司遲悞開試日期監察御史肅政廉訪司糾彈治罪流官子孫廕叙並依舊制願試中選者優陞一等在官未入流品願試者聽若中選之人已有九

品以上資級比附一高加一等注授若無品級止依試例從優銓注鄉試處所并其餘條目命中書省議行於賦經明行脩庶得真儒之用風移俗易益臻至治之隆咨爾多方體予至意中書省所定條目鄉試中選者各給解據錄連取中科文行省移咨都省送禮部腹裏宣慰司及各路關申禮部拘該監察御史廉訪司依上錄連科文申臺轉呈都省以憑照勘鄉試八月二十日蒙古色目人試經問五條漢人南人明經經疑二問經義一道二十三日蒙古色目人試策一道漢人南人古賦詔誥章表內科一道二

十六日漢人南人試策一道 會試省部依鄉試例
於次年二月初一日試第一場初三日第二場初五
日第三場 御試三月初七日前期奏委考試官二
員監察御史二員讀卷官二員入殿廷考試每舉子
一名怯薛可一人看守漢人南人試策一道限一千
字以上成蒙古色目人時務策一道限五百字以上
成 選考試官行省與宣慰司及腹裏各路有行臺
及廉訪司去處與臺憲官一同商議選差上都大都
從省部選差在內監察御史在外廉訪司官一員監
試每處差考試官同考試官各一員並於見任并在

開 德望文學常選官內選差封彌官一員謄錄官
一 選廉幹文資正官充之凡謄錄試卷并行移文
字 用朱書仍須設法關防毋致容私作弊省部會
試 省選委知貢舉同知貢舉官各一員考試官四
員監察御史二員彌封謄錄對讀官監門等官各一
員 鄉試行省一十一河南陝西遼陽四川甘肅雲
南嶺北征東江浙江西湖廣宣慰司二河東山東直
隸省部路分四真定東平大都上都 天下選合格
者三百人赴會試於內取中選者一百人內蒙古色
目漢人南人分卷考試各二十五人蒙古人取合格

者七十五人大都十五人上都六人河東五人真定
 等五人東平等五人山東四人遼陽五人河南五人
 陝西五人甘肅三人嶺北三人江浙五人江西三人
 湖廣三人四川一人雲南一人征東一人色目人取
 合格者七十五人大都十人上都四人河東四人東
 平等四人山東五人真定等五人河南五人四川三
 人甘肅二人陝西三人嶺北二人遼陽二人雲南二
 人征東一人湖廣七人江浙十一人江西六人漢人
 取合格者七十五人大都一十人上都四人真定等
 十一人東平等九人山東七人河東七人河南九人

四川五人雲南二人甘肅二人嶺北一人陝西五人
 遼陽二人征東一人南人取合格者七十五人湖廣
 一十八人江浙二十八人江西二十二河南七人

鄉試會試許將禮部韻畧外餘並不許懷挾文字

差搜檢懷挾官一員每舉人一名差軍一名看守無

軍人處差巡軍 提點擗掠試院差庶幹官一員度

地安置席舍務令隔遠仍自試官入院後常川妨職

監押外門 鄉試會試彌封謄錄對讀官下吏人於

各衙門從便差設 試卷不考格犯御名廟諱及文

理紕繆塗注乙五十字以上者不考謄錄所承受試

卷並用朱書謄錄正文實計塗注乙字數標寫對讀無差將朱卷逐旋送考試所如朱卷有塗注乙字亦皆標寫字數謄錄官書押候考校合格中選人數已定抄錄字號索上元卷請監試官知貢舉官同試官對號開拆舉人試卷各人自備三場文卷并草卷各一十二幅於卷首書三代籍貫年甲前期半月於印卷所投納置簿收附用印鈐縫訖各還舉人凡就試之日日未出入場黃昏納卷受卷官送彌封所撰字號封彌訖送謄錄所科舉既行之後若有各路歲貢及保舉儒人等文字到官並令還赴本鄉應

試 倡優之家及患廢疾若犯十惡奸盜之人不許

應試 舉人於試場內毋得喧譁違者治罪仍殿二

舉 舉人與考試官有五服內親者自須回避仍令

同試官考卷若應避而不自陳者殿一舉 鄉試會

試若有懷挾及令人代作者漢人南人有居父母喪

服應舉者並殿二舉 國子監學歲貢生貢及伴讀

出身並依舊制願試者聽中選者於監學合得資品

上從優銓注 別路附籍蒙古色目漢人大都上都

有恒產住經年深者從兩都官司依上例推舉就試

其餘去處冒貫者治罪

知貢舉以下官會集至公堂議擬合行事目云 諸
輒於彌封所取問舉人試卷封號姓名及漏泄者治
罪諸試題未出而漏泄者許人告首諸對讀試卷官
不躬親而輒令人吏對讀其對讀訖而差誤有礙考
校者有罰諸謄錄人書寫不慎及錯誤有礙考校者
重事責罰諸官司故縱舉人私將試卷出院及抵應
人知而爲傳送者許人告首諸監試官掌試院事不
得干預考校諸試院官在簾內者不許與簾外官交
語諸色人無故不得入試廳諸舉人謗毀主司率衆
喧競不服止約者治罪諸舉人就試無故不冠及擅

移坐次者或偶與親姻隣坐而不自陳者懷挾代筆
傳義者並扶出諸拆毀試卷首家狀者推治諸舉人
於試卷書他語者駁放涉謗訕者推治諸試日爲舉
人傳送文書及因而受財者並許人告諸舉人於別
紙上起草者出榜退落諸科文內不得自叙苦辛門
第委謄錄所點檢得如有違犯更不謄錄移文考試
院出榜退落諸冒名就試別立姓名及受財爲人懷
挾代筆傳義者並許人告諸被黜而妄訴者治罪諸
監門官譏察出入其物應入者拆封點檢諸巡鋪官
及兵級不得喧擾及輒視試文并容縱舉人無故往

來非因公事不得與舉人私語諸試卷彌封用印訖以三不成字爲號標寫仍於塗注乙處用印 每舉人一名給祗應巡軍一人隔夜入院分宿席房試日擊鍾爲節一次院官以下皆盥漱二次監門官啓鑰舉人入院搜檢訖就將解據呈納禮生贊白舉人再拜知貢舉官隔簾受一拜跪答一拜試官受一拜答一拜鍾三次頒題就次日午賜膳其納卷者赴受卷所揖而退不得交語受卷官書舉人姓名于曆舉人揖而退取解據出院巡軍亦出至晚鳴鍾一次鎖院門第二場舉人入院依前搜檢每十人一甲序立至

公堂下作揖畢頒題就次第三場如前儀 其受卷官具受到試卷逐旋開發彌封官將家狀草卷腰封用印蒙古色目漢人南人分卷以三不成字撰號每名累場同用一號於卷上親書及於曆內標附訖牒送騰錄官置曆分給吏人並用朱書騰錄正文仍具元卷塗注乙及騰錄塗注乙字數卷末書騰錄人姓名騰錄官具銜書押用印鈐縫牒送對讀所翰林掾史具騰錄訖試卷總數呈報監察御史對讀官以元卷與朱卷躬親對讀無差具銜書押呈解貢院元卷發還彌封所各所行移並用朱書試卷照依元號附

簿 試官考卷知貢舉居中試官相對向坐公同考
校分作三等逐等又分上中下用墨筆批點考校既
定收掌試卷官於號簿內標寫分數知貢舉官同試
官監察御史彌封官公同取上元卷對號開拆知貢
舉於試卷家狀上親書省試第幾名拆號既畢應有
試卷並付禮部架閣貢舉諸官出院中書省以中選
舉人分爲二榜揭于省門之左右 三月初四日中
書省奏准以初七日御試舉人於翰林國史院定委
監試官及諸執事初五日各官入院初六日撰策問
進呈俟上采取初七日執事者望闕設案於堂前置

策題於上舉人入院搜檢訖蒙古人作一甲序立禮
生導引至於堂前望闕兩拜賜策題又兩拜各就次
色目人作一甲漢人南人作一甲如前儀每進士一
人差蒙古宿衛士一人監視日午賜膳進士納卷畢
出院監試官同讀卷官以所對策第其高下分爲三
甲進奏作二榜用敕黃紙書揭于內前紅門之左右
前一日禮部告諭中選進士以次日詣闕前所司
具香案侍儀舍人唱名謝恩放榜擇日賜恩榮宴于
翰林國史院押宴以中書省官凡預試官並與宴預
宴官及進士並簪華至所居擇日恭詣殿廷上謝恩

表次日詣中書省參見又擇日詣進士詣先聖廟行
舍菜禮第一人具祝文行事刻石題名於國子監

延祐二年春三月廷試進士賜護都荅兒張起巖等
五十有六人及第出身有差 五年春三月廷試進

士護都達兒霍希賢等五十人 至治元年春三月

廷試進士達普化宋本等六十有四人 泰定元年

春三月廷試進士捌刺張益等八十有六人 四年

春三月廷試進士阿察赤李黼等八十有六人 天

曆三年春三月廷試進士篤列圖王文煒等九十有

七人 元統癸酉科廷試進士同同李齊等復增名

額以及百人之數稍異其制左右榜各三人皆賜進

士及第餘賜出身有差科舉取士莫盛於斯後三年

其制遂罷又七年而復興遂稍變程式減蒙古色目

人明經二條增本經義易漢南人第一場四書疑一

道爲本經疑增第二場古賦外於詔誥章表內又科

一道此有元科目取士之制大略如此若夫會試下

第者自延祐創設之初丞相帖木迭兒阿散及平章

李孟等奏下第舉人年七十以上者與從七品流官

致仕六十以上者與教授元有出身者於應得資品

上稍優加之無出身者與山長學正受省劄後舉不

爲例今有來遲而不及應試者未曾區用取旨帝曰
依下第例恩之勿著爲格 恭定元年三月中書省
臣奏下第舉人仁宗延祐間命中書省各授教官之
職以慰其歸今當改元之初恩澤宜溥蒙古色目人
年三十以上并兩舉不第者與教授以下與學正山
長漢人南人年五十以上并兩舉不第者與教授以
下與學正山長先有資品出身者更優加之不願仕
者令備國子員後勿爲格從之自餘下第之士恩例
不可常得間有試補書吏以登仕籍者惟已廢復興
之後其法始變下第者悉授以路府學正及書院山
長又增取鄉試備榜亦授以郡學錄及縣教諭於是
科舉取士得人爲盛焉

學校

世祖至元八年春正月始下詔立京師蒙古國子學
教習諸生於隨朝蒙古漢人百官及怯薛等官員選
子弟俊秀者入學然未有員數 以通鑑節要用蒙
古語言譯寫教之俟生員習學成效出題試問觀其
所對精通者量授官職成宗大德十年春二月增生
員廩饒通前三十員爲六十員武宗至大二年定伴
讀員四十人以在籍上名生員學問優長者補之仁

宗延祐二年冬十月以所設生員百人蒙古五十人色目二十人漢人三十人而百官子弟之就學者常不下二三百人宜增其廩餼乃減去庶民子弟一百一十四員聽陪堂學業於見供生員一百名外量增五十名元置蒙古二十人漢人三十人其生員紙扎筆墨止給三十人歲凡二次給之至元六年秋七月置諸路蒙古字學十二月中書省定學制頒行之命諸路府官子弟入學上路二人下路二人府一人州一人餘民間子弟上路三十人下路二十五人願充生徒者與免一身雜役以譯寫通鑑節要頒行各

路俾隸習之至成宗大德五年冬十月又定生員散府二十人上中州十五人下州十人元貞元年命有司割地給諸路蒙古學生員廩其學官至元十九年定擬路府路設教授以國字在諸字之右府州教授一任准從八品再歷路教授一任准正八品任回本等遷轉大德四年添設學正一員上自國學下及州縣舉生員高等從翰林考試凡學官譯史取以充焉

世祖至元二十六年夏五月尚書省臣言亦思替非文字宜施於用今翰林院益福的哈魯丁能通其字

學乞授以學士之職凡公卿大夫與夫富民之子皆依漢人入學之制日肄習之帝可其奏是歲八月始置回回國子學至仁宗延祐元年四月復置回回國子監設監官以其文字便於關防取會數目令依舊制篤意領教泰定二年春閏正月以近歲公卿大夫子弟與夫凡民之子入學者衆其學官及生員五十餘人已給飲膳者二十七人外助教一人生員二十四人廩餼並令給之學之建置在於國都凡百司庶府所設譯史皆從本學取以充焉

太宗六年癸巳以馮志常爲國子學總教命侍臣子

第十八人入學世祖至元七年命侍臣子弟十有一人入學以長者四人從許衡童子七人從王恂至二十四年立國子學而定其制設博士通掌學事分教三齋生員講授經旨是正音訓上嚴教導之術下考肄習之業復設助教同掌學事而專守一齋正錄申明規矩督習課業凡讀書必先孝經小學論語孟子大學中庸次及詩書禮記周禮春秋易博士助教親授句讀音訓正錄伴讀以次傳習之講說則依所讀之序正錄伴讀亦以次而傳習之次日抽籤令諸生復說其功課對屬詩章經解史評則博士出題生員

具藁先呈助教俟博士既定始錄附課簿以憑考校
其生負之數定二百人先令一百人及伴讀二十人
入學其百人之內蒙古半之色目漢人半之許衡又
著諸生入學雜儀及日用節目七年命生負八十人
入學俾永爲定式而遵行之成宗大德八年冬十二
月始定國子生蒙古色目漢人三歲各貢一人十年
冬閏十月國子學定蒙古色目漢人生負二百人三
年各貢二人武宗至大四年秋閏七月定生負額三
百人冬十二月復立國子學試貢法蒙古授官六品
色目正七品漢人從七品試蒙古生之法宜從寬色

目生宜稍加密漢人生則全科場之制仁宗延祐二
年秋八月增置生負百人陪堂生二十人用集賢學
士趙孟頫禮部尚書元明善等所議國子學貢試之
法更定之一曰陞齋等第六齋東西相向下兩齋左
曰游藝右曰依仁凡誦書講說小學屬對者隸焉中
兩齋左曰據德右曰志道講說四書課肄詩律者隸
焉上兩齋左曰時習右曰日新講說易書詩春秋科
習明經義等程文者隸焉每齋負數不等每季考其
所習經書課業及不違規矩者以次迓陞二曰私試
規矩漢人驗日新時習兩齋蒙古色目取志道據德

兩齋本學舉實歷坐齋二周歲以上未嘗犯過者許令充試限實歷坐齋三周歲以上以充貢舉漢人私試孟月試經疑一道仲月試經義一道季月試策問表章詔誥科一道蒙古色目人孟仲月各試明經一道季月試策問一道辭理俱優者為上等準一分理優辭平者為中等準半分每歲終通計其年積分至八分以上者陞充高等生員以四十名為額內蒙古色目各十名漢人二十名歲終試貢員不必備惟取實才有分同闕少者以坐齋月日先後多少為定其未及等并雖及等無關未補者其年積分並不為用

下年再行積算每月初二日蚤旦圓揖後本學博士助教公座面引應試生員各給印紙依式出題考試不許懷挾代筆各用印紙真楷書寫本學正錄彌封謄錄餘並依科舉式助教博士以次考定次日監官覆考於名簿內籍記各得分數本學收掌以俟歲終通考三曰黜罰科條應私試積分生員其有不事課業及一切違戾規矩者初犯罰一分再犯罰二分三犯除名從學正錄糾舉正錄知見而不糾舉者從本監議罰之應已補高等生員其有違戾規矩者初犯殿試一年再犯除名從學正錄糾舉之正錄知見而

不糾舉者亦從本監議罰之應在學生負歲終實歷
坐齋不滿半歲者並行除名除月假外其餘告假並
不準筭學正錄歲終通行考校應在學生負除蒙古
色目別議外其餘漢人生負三年不能通一經及不
肯勤學者勒令出學其餘責罰並依舊規泰定三年
夏六月更積分而爲貢舉並依世祖舊制其貢試之
法從監學所擬大槩與前法畧同而防閑稍加嚴密
焉其本學正錄各二員司樂一員典籍二員管勾一
員及侍儀舍人舊例舉積分生員充之後以積分既
革於上齋舉年三十以上學行堪範後學者爲正錄

通曉音律學業優瞻者爲司樂幹局通敏者爲典籍
管勾其侍儀舍人於上中齋舉禮儀習熟音吐洪暢
魯掌春秋釋奠每月告朔明贊衆與其能者充之文
宗天曆二年春三月惟伴讀員數自初二十人歲貢
二人後於大德七年定四十人歲貢六人至大四年
定四十人歲貢四人延祐二年歲貢八人爲淹滯既
額設四十名宜充部令史者四人路教授者四人是
後又命所貢生員每大比選士與天下士同試於禮
部策於殿廷又增至備榜而加選擇焉
國初燕京始平宣撫王揖請以金樞密院爲宣聖廟

太宗六年設國子總教及提舉官命貴臣子弟入學受業憲宗四年世祖在潛邸特命脩理殿廷及即位賜以玉笋俾永爲祭器至元十三年授提舉學校官六品印遂改爲大都路學署曰提舉學校所二十四年既遷都北城立國子學于國城之東延以南城國子學爲大都路學自提舉以下設官有差仁宗延祐四年大興府尹馬思忽重脩殿門堂廡建東西兩齋泰定三年府尹曹偉增建環廊文宗天曆二年復增廣之提舉郝義恭又增建齋舍自府尹郝朶而別至曹偉始定生員凡百人每名月餼京畿漕運司及本

路給之泰定四年夏四月諸生始會食于學焉

太宗始定中原即議建學設科取士世祖中統二年始命置諸路學校官凡諸生進脩者嚴加訓誨務使成材以備選用至元十九年夏四月命雲南諸路皆建學以祀先聖二十三年二月帝御德興府行宮詔江南學校舊有學田復給之以養士二十八年令江南諸路學及各縣學內設立小學選老成之士教之或自願招師或自受家學于父兄者亦從其便其他先儒過化之地名賢經行之所與好事之家出錢粟贍學者並立爲書院凡師儒之命於朝廷者曰教授

路府上中州置之命於禮部及行省及宣慰司者曰
學正山長學錄教諭路州縣及書院置之路設教授
學正學錄各一員散府上中州設教授一員下州設
學正一員縣設教諭一員書院設山長一員中原州
縣學正山長學錄教諭並受禮部付身各省所屬州
縣學正山長學錄教諭並受行省及宣慰司劄付凡
路府州書院設直學以掌錢穀從郡守及憲府官試
補直學考滿又試所業十篇陞爲學錄教諭凡正長
諭錄教諭或由集賢院及臺憲等官舉充之諭錄歷
兩考陞正長正長一考陞散府上中州教授上中州

教授又歷一考陞路教授教授之上各省設提舉二
員正提舉從五品副提舉從七品提舉凡學校之事
後改直學考滿爲州吏例以下第舉人充正長備榜
舉人充諭錄有薦舉者亦參用之自京學及州縣學
以及書院凡生徒之肄業於是者守令舉薦之臺憲
考覈之或用爲教官或取爲吏屬徃徃人材輩出矣
世祖中統二年夏五月太醫院使王猷言醫學久
廢後進無所師授竊恐朝廷一時取人學非其傳爲
害甚大乃遣副使王安仁授以金牌徃諸路設立醫
學其生員擬免本身檢醫差占等役俟其學有所成

每月試以疑難視其所對優劣量加勸懲後又定醫學之制設諸路提舉綱維之凡官壺所需省臺所用轉入常調可任親民其從太醫院自遷轉者不得視此例又以示仕途不可以雜進也然太醫院官既受宣命皆同文武正官五品以上遷叙餘以舊品職遞陞子孫廕用同正班叙其掌藥充都監直長充御藥院副使陞至大使考滿依舊例於流官銓注諸教授皆從太醫院定擬而各路主善亦擬同教授皆從九品凡隨朝太醫及醫官子弟及路府州縣學官並須試驗其各處名醫所述醫經文字悉從考校其諸藥所產性味真偽悉從辨驗其隨路學校每歲出降十

三科疑難題目具呈太醫院發下諸路醫學令生員依式習課醫義年終置簿解納送本司以定其優劣焉

世祖至元二十八年夏六月始置諸路陰陽學其在腹裏江南若有通曉陰陽之人各路官司詳加取勘依儒學醫學之例每路設教授以訓誨之其有術數精通者每歲錄呈省府赴都試驗果有異能則於司天臺內許令近侍延祐初令陰陽人依儒醫例於路府州設教授員凡陰陽人皆管轄之而上屬於太史

焉

舉遺逸以求隱跡之士擢茂異以待非常之人世祖中統間徵許衡授懷孟路教官詔於懷孟等處選子弟之後秀者教育之是年又詔徵金進士李冶授翰林學士徵劉因爲集賢學士不至又用平章咸寧王野仙薦徵蕭顛不起即授陝西儒學提舉至元十八年詔求前代聖賢之後儒醫卜筮通曉天文曆數并山林隱逸之士二十年復召拜劉因右贊善大夫辭不允未幾以親老乞終養俸給一無所受後遣使授命于家辭疾不起二十八年復詔求隱晦之士俾有

司具以名聞成宗大德六年徵臨川布衣吳激擢應奉翰林文字拜命即歸九年詔求山林間有德行文學識治道者遣使徵蕭顛且曰或不樂於仕可試一來與朕語而遣歸至大三年復召吳澄拜國子司業以病還延祐三年召拜集賢直學士以疾不赴至治三年召拜翰林學士武宗仁宗累徵蕭顛授集賢學士國子司業未赴改集賢侍講學士又以太子右諭德徵始至京師授集賢學士國子祭酒諭德如故仁宗延祐七年十一月詔曰比歲設立科舉以取人材尚慮高尚之士晦跡丘園無從可致各處其有隱居

行義才德高邁深明治道不求聞達者所在官司具
姓名牒報本道廉訪司覆奏察聞以備錄用文屢詔
求言於下使得進言於上雖指斥時政並無譴責往
往采擇其言任用其人列諸庶位以圖治功其他著
書立言裨益教化啓迪後人者亦斟酌錄用著爲常
式云

童子舉唐宋始著于科然亦無常負成宗大德三年
舉童子揚山童海童五年大都提舉學校所舉安西
路張秦山江浙行省舉張昇甫武宗至大元年舉武
福安仁宗延祐三年江浙行省舉俞傳孫馮怙哥六

年河南路舉張答罕學士完者不花舉丁碩碩七年
河間縣舉杜山童大興縣舉陳晬英宗至治元年福
州路連江縣舉陳元麟至治三年河南行省舉張英
泰定四年福州舉葉留畊文宗天曆二年舉杜夙靈
至順二年制舉答不歹子買來的皆以其天資穎
悟超出兒輩或能默誦經文書寫大字或能綴緝辭
章講說經史並令入國子學教育之惟張秦山尤精
篆籀陳元麟能通性理葉留畊問以四書大義則對
曰無過事父母能竭其力事君能致其身時人以遠
大期之

24429.5

志卷三十一

元史志卷三十一

古

11956.2

3030



